

四庫全書

史部

欽定四庫全書

文獻通考卷三百八

鄱陽馬端臨貴與著

物異考十四

人異

按傳曰皇之不極厥罰常陰時則有下人伐上之  
病昌邑王時霍光將議廢立而夏侯勝援此以諫  
王出遊光與張安世疑謀已泄而驚異其說然則

所謂下人伐上之病乃犯上反叛之謂然歷代史志只謂之人病而所載者則形體之妖異或舉動言語之狂惑或化為異物或已死復生殊不及叛逆之事蓋人病者妖也叛逆者其應也又下而犯上臣而背君其妖孰甚焉故總謂之人病云

春秋文公十一年敗狄于鹹

師古曰鹹魯地也

穀梁公羊傳曰

長狄

師古曰防風之後漆姓也國號鄭瞞鄭音所求反瞞莫干反

兄弟三人一者之

魯

師古曰僑如也來伐魯為叔孫得臣所獲

一者之齊

師古曰榮如也齊襄公二年伐齊為王子

成父  
所獲

一者之晉

師古曰焚如也宣十五年晉滅潞國而獲之

皆殺之身橫九

晦

師古曰晦古畝字

斷其首而載之肩見於軾

師古曰軾車前橫木

何以

書記異也劉向以為是時周室衰微三國為大可責者

也天戒若曰不行禮義大為暴亂之行將致危亡其後

三國皆有篡弑之禍

師古曰謂魯文公薨襄仲弑惡及視而立宣公齊連稱管至父弑襄

公而立無知晉欒書中行偃弑厲公而立悼公

近下人伐上之病也劉歆以為

人變屬黃祥一曰屬羸蟲之孽一曰天地之性人為貴

凡人為變皆屬皇極下人伐上之病云京房易傳曰君

暴亂疾有道厥妖長狄入國又曰豐其屋下獨苦

師古曰豐

其屋易豐卦上六爻辭豐大也

長狄生世主虜

史記魏襄王十三年魏有女子化為丈夫京房易傳曰

女子化為丈夫茲謂陰昌賤人為王丈夫化為女子茲

謂陰勝厥咎亡一曰男化為女宮刑濫也

如淳曰宮刑之行大濫也

女化男婦政行也

赧王三十一年齊有人當闕而哭者求之不得去則聞

其聲時燕昭王伐齊齊湣王出奔為楚將淖齒所弑

史記秦始皇帝二十六年有大人長五丈足履六尺皆

夷狄服凡十二人見於臨洮

師古曰隴西之縣也音吐高反

天戒若曰

勿大為暴亂之行將受其禍是歲始皇初并六國反喜  
以為瑞銷天下兵器作金人十二以象之遂自賢聖燔

詩書阬儒士奢淫暴虐務欲廣地南戍五嶺北築長城

以備胡越

師古曰五嶺解在張耳陳餘傳

斬山填谷西起臨洮東至遼

東徑數千里故大人見於臨洮明禍亂之起後十四年  
而秦亡亡自戍卒陳勝發

秦始皇三十六年鄭客從關東來至華陰望見素車白馬從華山上下知其非人道住止而待之遂至持璧與客曰為我遺瀉池君

長安西北有瀉池君則池神也江神告之

因言今年祖

龍死

祖始也龍人君象謂始皇也

忽不見客捧璧始皇使御史視之

即二十八年過江所湛璧也默然良久曰山鬼不過知一歲事也

漢高祖為亭長送徒驪山被酒夜經澤中有大蛇當徑乃拔劍斬蛇後人來至蛇所有一老嫗夜哭人問之曰

吾子白帝子也化為蛇當道今者赤帝子斬之故哭人以  
嫗為不誠欲苦之嫗因忽不見後人告高祖高祖心  
獨喜自負諸從者日益畏之 景帝二年九月膠東下  
密人年七十餘生角角有毛時膠西濟南齊四王有舉  
兵反謀謀由吳王濞起連楚趙凡七國下密縣居四齊  
之中角兵象上鄉者也老人吳王象也年七十七國象  
也天戒若曰人不當生角猶諸侯不當舉兵以鄉京師  
也禍從老人生七國俱敗云京房易傳曰冢宰專政厥



妖人生角 武帝征和元年上居建章宮見一男子帶  
劍入中龍華門疑其異人命收之男子捐劍走逐之弗  
獲上怒斬門候冬十一月發三輔騎士大搜上林閑長  
安城門索十一日乃解巫蠱始起 哀帝建平中豫章

有男子化為女子嫁為人婦生一子長安陳鳳言此陽  
變為陰將亡繼嗣自相生之象一曰嫁為人婦生一子  
者將復一世乃絕 哀帝建平四年四月山陽方與女

子田無嗇生子

師古曰方與者山陽之縣也女  
子姓田名無嗇方與音房豫

先未生

二月兒唬腹中及生不舉葬之陌上三日人過聞唬聲

母掘收養 平帝元始元年二月朔方廣牧女子趙春

病死

師古曰廣牧朔方之縣也姓趙名春

斂棺積六日

師古曰斂音力贍反棺音工喚反

出在棺外自言見夫死父曰年二十七不當死太守譚

以聞京房易傳曰幹父之蠱有子考无咎

韋昭曰蠱事也子能正父

之事是為有子故考不為咎累師古曰易蠱卦初六爻辭也

子三年不改父道思慕

不皇亦重見先人之非

師古曰言久有不善之事當速改之若唯思慕而已無所變易

是重顯先人之非也一曰三年之內但思慕而已不暇見父之非故不改也重音直用反

不則為私

厥妖人死復生一曰至陰為陽下人為上六月長安女

子有生兒兩頭異頸面相鄉四臂共胸俱前鄉

師古曰鄉讀曰

嚮

尻上有目長二寸所京房易傳曰睽孤見承負塗

師古

曰易睽卦上九爻辭也睽孤乖刺之意也塗泥也睽音苦攜反

厥妖人生兩頭下相攘

善妖亦同人若六畜首目在下茲謂亡上正將變更凡

妖之作以譴失正各象其類二首下不一也足多所任

邪也足少下不勝任或不任下也凡下體生於上不敬

也上體生於下媒瀆也生非其類淫亂也人生而大上

速成也生而能言好虛也羣妖推此類不改乃成凶也  
王莽始建國二年甄豐子尋坐偽作符命誅黨與死  
者數百人尋手理有天子字莽解其臂入視之曰此  
一大子也或一六子也六者戮也明尋父子當戮死  
也 是歲池陽縣有小人景長尺餘或乘車馬或步  
行操持萬物大小多相稱車馬及物皆稱人之形 三日止 天  
鳳四年連率韓博上言有奇士長丈大十圍來至臣  
府曰欲奮擊匈奴謂巨毋霸出於蓬萊東南五城西

北昭如海瀕

昭如海名也

輶車不能載三馬不能勝即日

以大車四馬建虎旗載霸詣闕霸卧則枕鼓以鐵著食乞迎之於道京師門戶不容者開高大之以視百

蠻

後漢靈帝建寧三年春河內婦食夫河南夫食婦

臣昭曰以

夫之尊在河之陽而陰承體卑吞食尊陽將非君道昏弱無居剛之德遂為陰細之人所能消毀乎夫為家之主而乃自食正內之人時宋皇后將立而靈帝一聽閹官無所厝心宋后終廢天戒若曰徒隨嬖豎之意夫噉其妻

二年雒陽上西門外女子生兒兩頭異肩共乳

俱前向以為不祥墮地棄之自此之後朝廷霧亂政在  
私門上下無別二頭之象後董卓弑太后被以不孝之  
名放廢天子後復害之漢元以來禍莫踰此 四年魏  
郡男子張博送鐵盧詣太官博上書室殿山居屋後宮  
禁落屋謹呼上收縛考問辭忽不自覺知臣昭曰魏人  
入宮既奪漢  
之徵至後宮而謹  
呼終亦禍廢母后 中平元年六月壬申雒陽男子劉

倉居上西門外妻生男兩頭共身 靈帝時江夏黃氏  
之母浴而化為黿入於深淵其後時出見初浴簪一銀

釵及見猶在其首

臣昭曰黃者代漢之色女人臣妾之體化為龜龜者元也入於深淵水實

制火夫君德尊陽利見九五飛在於天乃備光  
威俯等龜龜有愧潛躍首從戴釵卑弱未盡

獻帝

初平中長沙有人姓桓氏死棺斂月餘其母聞棺中聲發之遂生占曰至陰為陽下人為上其後曹公由庶士

起建安四年二月武陵充縣女子李娥年六十餘物

故其家以杉木槥斂墓於城外數里上巳十四日有行者聞冢中有聲便語其家其家往視聞聲便發出遂活七年越雋有男子化為女子時周羣上言哀帝時亦

有此異將有易代之事至二十五年獻帝封於山陽

建安中女子生男兩頭共身

魏文帝黃初初清河宋士宗母化為鰲入水 明帝太

和三年曹休部曲邱奚農女死復生時有閭周世冢得  
殉葬女子數日而有氣數月而能言郭太后愛養之又  
太原人發冢破棺棺中有一生婦人問其本事不知也  
視其墓木可三十歲按京房易傳曰至陰為陽下人為  
上宣帝起之象也漢平帝獻帝並有此異占以為王莽



曹操之證 青龍元年并州刺史畢軌送漢故渡遼將軍范明友鮮卑奴年三百五十歲而言語飲食如常人奴云霍顯光後小妻明友妻光前妻女時京邑有一人失其姓名食啖兼十許人遂肥不能動其父曾作遠方長吏官徒送彼縣令故義傳供食之一二年中一鄉輒為之儉 三年中壽春農民妻自言為天神所下命為登女當營衛帝室蠲邪納福飲人以水及以洗創或多愈者於是立館後宮下詔稱揚甚見優寵及景初二年

帝疾飲水無驗以致大漸於是斬焉 元帝咸寧二年

八月襄武縣言有大人見長三丈餘跡長三尺二寸髮白著黃巾單衣拄杖呼王始語曰今當太平晉尋代魏吳孫休時烏程人有得困病及瘥能以嚮言者言於此而聞於彼自其所聽之不覺其聲之大也自遠聽之如人對言不覺聲之自遠來也聲之所往隨其所向遠者所過十數里其隣人有責息於外歷年不還乃假之使為責讓懼以禍福負物者以為鬼神即顛倒畀之其人

亦自不知所以然也

按此事晉史置之言不從條下然此妖異也故今  
移置之人疴門云

孫休永安四年安吳氏陳焦死七日復生穿冢出于寶  
曰此與漢宣帝同事烏程侯皓承廢故之家得位之祥  
也 孫皓寶鼎元年丹陽宣騫母時年八十因浴化為  
黿兄弟閉戶衛之掘堂上作一大坎實水其中黿入坎  
遊戲一二日恒延頸外望伺戶小開便輪轉自躍入於

遠潭遂不復還此與漢靈帝時黃氏母事同吳亡之象也

晉武帝泰始五年元城人年七十生角殆趙王倫篡亂之象也咸寧二年十二月瑯邪人顏畿病死棺斂已久家人咸夢畿謂已曰我當復生可急開棺遂出之漸能飲食屈伸視瞻不能行語二年復死京房易傳曰至陰為陽下人為上厥妖人死復生其後劉石僭逆遂亡晉室下為上之應也惠帝元康中安豐有女子周世

寧八歲漸化為男子至十七八而氣性成京房易傳曰  
女子化為丈夫茲謂陰昌賤人為王此亦劉石覆蕩天  
下之妖也 元康中梁國女子許嫁已受禮聘尋而其  
夫戍長安經年不歸女家更以適人女不樂行其父母  
逼強不得已去尋病亡後其夫還問其女所在其家具  
說之其夫逕至女墓不勝哀情便發冢開棺女遂活因  
與歸家後壻聞知詣官爭之所在不能決祕書郎王導  
議曰此是非常事不得以常理斷之宜還前夫朝廷從

其議 惠帝世杜錫家葬而婢誤不得出後十年開冢  
祔葬而婢尚生始如瞑有頃漸覺問之自謂再宿爾初  
婢之埋年十五六及開冢更生猶十五六也嫁之有子

光熙元年會稽謝真生子頭大而有髮兩蹠

之石反

反

向上有男女兩體生便作丈夫聲經一日死此皇之不  
極下人伐上之病於是諸王有僭亂之象也 惠帝之

世京洛有人兼男女體亦能兩用人道而性尤淫此亂  
氣所生自咸寧太康之後男寵大興甚於女色士大夫

莫不尚之天下相倣倣或至夫婦離絕多生怨曠故男  
女氣亂而妖形之作也 懷帝永嘉元年吳郡吳縣萬  
祥婢生子鳥頭兩足馬蹄一手無毛尾黃色大如枕此  
亦人妖亂之象也 五年五月枹罕令嚴根妓產一龍  
一女一鵝京房易傳曰人生他物非人所見者皆為天  
下大兵是時帝承惠皇之後四海沸騰尋而陷於平陽  
為劉氏所害此其徵也 愍帝建興四年新蔡縣吏任  
僑妻產二女腹與心相合自胷以上臍以下各分此蓋

天下未一之妖也時內史呂會上言按瑞應圖異根同  
體謂之連理異畝同穎謂之嘉禾草木之異猶以為瑞  
今二人同心易稱二人同心其利斷金蓋四海同心之  
瑞也時皆哂之俄而四海分崩帝亦淪沒元帝太興  
初有女子其陰在腹當臍下自中國來至江東其性淫  
而不產又有女子陰在首渡在揚州性亦淫京房易傳  
曰人生子陰在首天下大亂在腹天下有事在背天下  
無後於時王敦據上流將欲為亂是其徵三年十二



月尚書駙謝平妻生女墮地鼻鼻

反 匹 備

有聲湏臾便死

鼻目皆在頂上面處如項口有齒都連為一胷如鼈手

足爪如鳥爪皆下勾此亦人生他物非人所見者後二

年有石頭之敗 明帝太寧二年七月丹陽江寧侯紀

妻死經三日復生 成帝咸康五年四月下邳民王和

僑居暨

反 居 未

陽息女可年二十自云上天來還得徵瑞

印綬當母天下晉陵太守以為妖收付獄至十一月有

人持柁

反 之 夜

杖絳衣詣止車門口列為聖人使求見天

子門候受辭辭稱姓呂名賜其言王和女可右足下有  
七星星皆有毛長七寸天今命可為天下母奏聞即伏  
誅并下晉陵誅可 康帝建元二年十月衛將軍營督

過望所領兵陳漬女臺有文在其足曰天下之母灸之  
愈明京都諠譁有司收繫以聞俄自建康縣獄亡去明  
年帝崩獻后臨朝此其祥也 孝武帝寧康初南郡州

陵女唐氏漸化為丈夫 安帝義熙七年無錫人趙未

年八歲一旦暴長八尺髭鬚

上即移反  
下相俞反

蔚音尉然三日而

死 義熙中東陽人莫氏生女不養埋之數日於土中  
帝取養遂活 義熙末豫章吳平人有二陽道重累生  
恭帝元熙元年建安人陽道無頭正平本下作女人  
形體

劉聰子約死一指猶暖遂不殯殮及蘇言見元海於  
不周山經五日而遂復從至崑崙山三日而復返於  
不周見諸王公卿將相死者悉在宮室甚壯麗號曰  
蒙珠離國元海謂約曰東北有遮須夷國無主久待

汝父為之汝父後三年當來來後國中大亂相殺害  
吾家死亡畧盡但可永明輩十數人在耳汝宜還後  
年當來見汝不久約拜辭而回道過一國曰猗尼渠  
餘國引約入宮與約皮囊一枚曰為吾遺漢皇帝約  
辭而歸謂約曰劉郎後年來必見過當以小女妻之  
約歸置皮囊於机上俄而蘇使左右机上取皮囊開  
視之有一方白玉題文曰猗尼渠餘國天王敬信遮  
須夷國天王歲在攝提當相見也馳使呈聰聰曰若

審如此吾不懼死也及聰死與此王并葬焉 苻健  
時新平有長人見語百姓張靖曰苻氏應天受命今  
當太平外面者歸中而安泰問姓名弗答俄而不見  
新平令以聞健以為妖下靖獄會大雨霖河渭溢浦  
津監寇登得一履於河長七尺三寸人跡稱之指長  
尺餘文深一寸健歎曰覆載之中何所不有張靖所  
見定不虛也乃赦之

宋明帝泰豫元年正月丁巳巨人跡見西池冰上

梁武帝時海中浮鵠山去餘姚岸可千餘里上有女人  
年三百歲有女官道士四五百人年並出百但在山學  
道遣使獻紅席帝方捨身時其使適至云此草常有紅  
鳥居下故以為名觀其圖象則鸞鳥也時又有男子不  
知何許人於大衆中自割身以飼餓鳥血流徧體而顏  
色不變又沙門智泉鐵鉤挂體以燃千燈一日一夜端  
坐不動 太清元年丹陽有莫氏妻生男眼在頂上大  
如兩歲兒墮地而言曰兒是旱疫鬼不得佳母曰汝當

令我得過疫鬼曰有上官何得自由母可急作絳帽故  
當無憂母不暇作帽以絳繫髮自是旱疫者二年揚徐  
兗豫尤甚莫氏鄉鄰多以絳免他土效之無驗 簡文  
大寶二年京口人於藏兒年五歲登城西南角大樓打  
鼓作長槓鼓兵象也時侯景亂江南 元帝承聖元年  
十二月天門山獲野人出山三日而死

陳武帝永定三年有人長三文見羅浮山通身潔白衣  
服楚麗京房易傳曰長人見亡後二歲帝崩 後主為

太子時有婦人寢入東宮而大言曰畢國主後主立而祚終之應也 至德三年八月建康人家婢死埋之九日而更生有牧牛人聞而出之 禎明二年有神自稱老子游於都下與人對語而不見形言吉凶多驗得酒輒釀之經三四年乃去有船下忽聞人言曰明年亂視之得死嬰兒長三尺而無頭明年陳亡

後魏太武大延元年有鄙婦人持方寸玉印詣潞縣侯孫家既而亡去莫知所在印有三字為龍鳥之形要妙



奇巧不類人跡文曰旱疫平

後齊文宣天保中臨漳有婦人產子二頭共體是後政  
由奸佞上下無別兩頭之應也 武成河清四年有神  
見於後園萬壽堂前山穴中其體壯大不辨其面兩齒  
絕白長出於唇帝直宿嬪御已下七百人咸見焉帝又  
夢之 後主武平五年大旱晉陽得死魃長二尺面頂  
各二目帝聞之使刻木為其形以獻

後周武帝保定三年有人產子男陰在背上如尾兩足

指如獸爪陰不當生於背而生者陰陽反覆君臣顛倒之象也人足不當有爪而有者將致攫人之變也時晉公護專政征伐自己陰懷篡逆帝誅之武帝時有強練者佯狂持一瓢至晉蕩公護門而擊破之曰身尚可子苦矣時護專政因朝太后帝擊殺之發兵捕其諸子皆備楚毒而死強練又行乞於市人或遺之粟麥輒以無底帛受之因大笑曰盛空未幾周滅高祖移都長安城為墟矣

隋高祖開皇六年霍州有老翁化為猛獸 七年相州

有桑門變為蛇尾繞樹而自抽長二丈許 仁壽四年

有人長數丈見於應門其跡長四尺五寸其年帝崩

煬帝大業元年鴈門人房回安母年百歲額上生角長

二寸洪範五行傳曰婦人陰象也角兵象也下反上之

應是後天下果大亂陰戎圍帝於鴈門 四年鴈門宋

谷村有婦人生一肉卵大如斗埋之後數日所埋處雲

霧盡合從地雷震而上視之洞穴失卵所在 六年趙

郡李來王家有婢產一物大如卵 七年正月朔旦有盜衣白練裙襦手持香花自稱彌勒佛出世入建國門奪衛士仗將為亂齊王暕遇而斬之後三年楊元感作亂引兵圍洛陽戰敗乃伏誅 八年有澄公者若狂人於東都大叫唱賊帝聞而惡之明年元感作亂舉兵圍洛陽至十二年澄公又大叫賊李密逼東都孟讓燒豐東都市而去 九年帝在高陽唐縣人宋子賢善為幻術每夜樓上有光明能變作佛形自稱彌勒出世又懸

大鏡於堂上紙素上畫為蛇為獸及人形有人來禮謁者轉側其鏡遣觀來生形像或映見紙上蛇形子賢輒告云此罪業也當更禮念又令禮謁乃轉人形京之遠近惑信日數百千人遂潛謀作亂將為無遮佛會因舉兵欲襲擊乘輿事泄鷹揚郎將以兵捕之夜至其所遶其所居但見火坑兵不敢進郎將曰此地素無坑止妖妄耳及進無復火矣遂擒斬之并坐其黨與千餘家其後復有桑門向海明於扶風自稱彌勒佛出世潛謀逆

亂人有歸心者輒獲吉夢由是人皆惑之三輔之士翕然稱為大聖因舉兵反衆至數萬官軍擊破之京房易飛候曰妖言動衆者茲謂不信路無人行不出三年起兵自是天下大亂路無人行

唐高祖武德四年太原尼志覺死十日而蘇太宗貞觀十九年衛州人劉道安頭生肉角隱見不常因以惑衆伏誅角兵象肉不可以觸者高宗永徽六年淄州高苑民吳威妻嘉州民辛道護妻皆一產四男凡物反

常則為妖亦陰氣盛則母道壯也 顯慶三年普州有  
人化為虎虎猛噬而不仁 儀鳳三年四月涇州獻二  
小兒連心異體初鶉鵒縣衛士胡萬年妻吳生一男一  
女其胸相連餘各異體乃析之則皆死又產復然俱男  
也遂育之至是四歲以獻於朝 永隆元年長安獲女  
魑長尺有二寸其狀怪異詩曰旱魃為虐如惓如焚是  
歲秋不雨至於明年正月 二年九月萬年縣女子劉  
凝靜衣白衣從者數人升太史令廳問比有何災異令

執之以聞是夜彗星見太史司天文歷候王者所以奉  
若天道恭授民時者非女子所當問 武后載初中涪  
州民范端化為虎 神功元年二月庚子有人走入端  
門又入則天門至通天宮閣及仗衛不之覺時來俊臣  
婢產肉塊如二升器剖之有赤蟲須臾化為蜂螫人而  
去 久視二年正月成州有大人跡見長安中郴州佐  
史因病化為虎欲食其嫂擒之乃人也雖未全化而虎  
毛生矣 睿宗太極元年狂人段萬謙潛入承天門登



太極殿升御牀自稱天子且言我李安國也人相我年  
三十二當為天子 元宗開元二十三年四月冀州獻  
長人李家寵八尺有五寸 代宗大歷十年二月昭應  
婦人張產一男二女 德宗貞元八年正月丁亥許州  
人李狗兒持杖上含元殿擊欄檻伏誅 十年四月恒  
州有巨人跡見 十五年正月戊申狂人劉忠詣銀臺  
稱白起令上表天下有火災 十七年十一月翰林待  
詔戴少平死十有六日而蘇是歲宣州南陵縣丞李嶷

死已殯三十日而蘇 憲宗元和二年商州洪崖冶役  
夫將化為虎衆以水沃之不果化 穆宗長慶四年三  
月民徐忠信潛入浴堂門 敬宗寶歷二年十二月延  
州人賀文妻一產四男 文宗太和二年十月狂人劉  
德廣入含元殿 懿宗咸通七年渭州有人生角寸許  
占曰天下有兵 十三年四月太原晉陽民家有嬰兒  
兩頭異頸四手聯足此天下不一之妖是歲民皇甫及  
年十四暴長七尺餘長啜大嚼三倍如初歲餘死 僖

宗乾符六年秋蜀郡婦人尹生子首如豕目在臍下占  
曰君失道 光啓元年隰州溫泉民家有死者既葬且  
半月行人聞聲呼地下其家發之則復生歲餘乃死

二年春鳳翔郿縣女子未齒化為丈夫旬日而死京房  
易傳曰茲謂陰昌賊人為王 昭宗大順元年六月資  
州兵王全義妻如孕覺物漸下入股至足大拇痛甚折  
而生珠如彈丸漸長大如杯 天祐二年五月潁州汝  
陰民彭文妻一產三男

蜀王建元年巨人見青城山

南漢劉鋹時南海民妻生子兩首四臂

宋自太祖建隆元年至真宗天禧四年郡縣上言民妻  
產三男者凡一百九產四男者凡三產一男三女者二  
產二男一女者一 太祖建隆三年齊州晉州大旱民  
家多生魃 太宗太平興國九年揚州揚子縣民妻生  
男毛被體半寸餘面長頂高鵠肩眉毫麤密近髮際有  
毛兩道軟長眼微紫唇紅厚耳鼻大類胡僧至三歲畫

圖以獻 淳化元年八月汾州悉達院僧智嚴頭生角  
可長三寸 真宗天禧四年七月衡州耒陽縣民張中  
妻產三男其一額有白痣方寸餘上生白髮 仁宗天  
聖至英宗治平婦人生四男者二生三男者四十四生  
二男一女者一說者曰天下安寧人民蕃息之驗也  
神宗熙寧元年距元豐七年郡邑民家生三男者八十  
四而四男者一二男一女者一 元豐八年至哲宗元  
符二年生三男者十八而四男者二三男一女者一

元符三年至欽宗靖康生三男者十九四男者一 徽  
宗宣和六年都城有賣青果男子孕而誕子蓐母不能  
收易七人始免而逃去又有酒肆號豐樂樓酒保朱氏  
子之妻可四十餘楚州人忽生髭長僅六七寸疏秀而  
美宛然一男子特詔度為女道士 高宗紹興三年建  
康府桐林灣人產兒肉角有齒角兵象肉不可以觸者  
是歲人多產鱗毛皆人病也 二十年八月洋州真符  
縣民家一產三男 孝宗隆興元年建康民流寓行都

產子二首具羽毛之形 乾道五年衡湘間有人化為

虎者與唐志顯慶三年人病同占餘杭縣民婦產子青

而毛二肉角又有二家婦產子毛角亦如之皆連體兩

面相鄉

鄉與嚮同

三家纔相去一二里病氣同所鍾也又潮

州城西婦孕過期產兒如拍大五體皆具者百餘蠕蠕

能動人病之異也 淳熙十年鄱陽南鄉民產子兩肘


各有二臂長十五歲每鬪則六臂並運 十三年行都

有人死十四日復生十一月辛未鄧家巷民婦產肉塊

三其一直目而橫口 十四年六月臨安府浦頭民產  
子生而能言四日暴長四尺 光宗紹熙元年平江府  
崑山縣石工採石而山摧工壓焉三年六月他工採石  
鄰山聞其聲呼相應答如平生報其家鑿石出之見其  
妻喜曰久閉乍風肌如裂俄頃聲微噤不語化為石人  
貌如生 寧宗慶元元年饒州樂平民產子人體有尾  
永州民產兒首有角腋有肉翅 二年七月隆興府進  
賢縣民產子亦如之而面有三目 嘉定元年四月鎮



江後軍妻生子一身二首四臂晉志謂中原分裂應此人病也後數年金人失中原



文獻通考卷三百八

欽定四庫全書

史部

文獻通考卷三百十九

詳校官內閣學士<sub>臣</sub>瑞保

編修<sub>臣</sub>程嘉謨覆勘

覆校官中書<sub>臣</sub>孫希旦

校對官中書<sub>臣</sub>金光悌

謄錄監生<sub>臣</sub>周連元

欽定四庫全書

文獻通考卷三百九

鄱陽馬端臨貴與著

物異考十五

詩異

春秋左氏傳晉獻公時童謡曰丙之晨龍尾伏辰衿服

振振取號之旂

師古曰徒歌曰謡衿衿服黑衣振振衿服之貌也衿音均又音弋春反振只人反

鶉之賁賁天策煇煇火中成軍號公其犇

師古曰犇音奔煇音吐敦

反又音敦  
犇古奔字

是時號為小國介夏陽之阨怙虞國之助

師古

曰介  
隔也

亢衡於晉有炕陽之節失臣下之心晉獻伐之問

於卜偃曰吾其濟乎

師古曰卜偃晉大夫主卜者

偃以童謠對曰克

之十月朔丙子旦日在尾月在策鶉火中必此時也冬

十二月丙子朔晉師滅虢虢公醜犇周周十二月夏十

月也言天者以夏正 史記晉惠公時童謠曰恭太子

更葬兮後十四年晉亦不昌昌廼在其兄是時惠公賴

秦力而立立而背秦內殺二大夫

師古曰謂里克丕鄭

國人不說

師古曰說及更葬其兄恭太子申生而不敬故詩妖作

讀曰悅也後與秦戰爲秦所獲立十四年而死晉人絕之更立

其兄重耳是爲文公遂伯諸侯師古曰伯左氏傳文

武之世童謡曰鸛之鵠之公出辱之師古曰鸛音鸛鵠

之羽公在外野往饋之馬師古曰饋鸛鵠跣跣公在乾

侯臣瓚曰乾侯在魏郡斥丘縣師古徵褰與襦師古曰

褰袴也言公出鸛鵠之巢遠哉搖搖師古曰搖搖稠父

外求袴襦之服喪勞宋父以驕師古曰父讀曰甫甫者男子之通號故

云稠甫宋甫也言昭公欲去季氏不遂

而出故曰喪勞定公無德

於下坐致君位故曰以驕鶚鵠鶚鵠往歌來哭

師古曰謂昭公

生時出奔死

乃以喪歸之至昭公時有鶚鵠來巢公攻季氏敗出奔

齊居外野次乾侯八年死于外歸葬魯昭公名裯公子宋立是爲定公

漢元帝時童謠曰井水溢滅竈煙灌王堂流金門至成帝建始二年三月戊子北宮中井泉稍上溢出南流象春秋時先有鶚鵠之謠而後有來巢之驗井水陰也竈煙陽也王堂金門至尊之居象陰盛而滅陽竊有宮室

之應也王莽生於元帝初元四年至成帝封侯爲三公

輔政因以篡位 成帝時童謠曰燕燕尾涎涎

師古曰涎涎光

澤貌音徒見反

張公子時相見木門倉琅根燕飛來啄皇孫皇

孫死燕啄矢其後帝爲微行出遊常與富平侯張放俱

稱富平侯家人過河陽主作樂見舞者趙飛燕而幸之

故曰燕燕尾涎涎美好貌也張公子謂富平侯也木門

倉琅根謂宮銅鍤

師古曰門之鋪首及銅鍤也銅色青故曰倉琅鋪首銜鍤故謂之根鍤讀

與環同

言將尊貴也後遂立爲皇后弟昭儀賊害後宮皇

子卒皆伏辜所謂燕飛來啄皇孫皇孫死燕啄矢者也  
成帝時歌謠又曰邪徑敗良田讒口亂善人桂樹華  
不實黃爵巢其顛古爲人所羨今爲人所憐桂赤色漢  
家象華不實無繼嗣也王莽自謂黃象黃爵巢其顛也  
王莽末天水童謠曰出吳門望緹羣見一蹇人言欲  
上天今天可上地上安得民時隗囂初起兵於天水  
後意稍廣欲爲天子遂破滅囂少病蹇吳門冀郭門  
名也緹羣山名也



後漢更始時南陽有童謠曰諧不諧在赤眉得不得在河北是時更始在長安世祖為大司馬平定河北後更始為赤眉所殺世祖自河北興世祖建武元年帝先在長安時同舍生彊華自關中奉赤伏符曰劉秀發兵捕不道四夷雲集龍鬬野四七之際火為主四七二十年自高祖至光武初起合二百二十八年即四七之際也漢火德故火為主也羣臣奏以為受命

之符光武乃命有司設壇場以六月己未即皇帝位於鄴改鄴為高邑建武六年蜀有童謠曰黃牛白腹五

銖當復是時公孫述僭號於蜀時人竊言王莽稱黃述  
欲繼之故稱白五銖漢家貨明當復也述遂誅滅順  
帝之末京都童謠曰直如弦死道邊曲如鉤反封侯按  
順帝即世孝質短祚大將軍梁冀貪樹疏幼久專國柄  
太尉李固以清河王年長有德欲立之冀白太后策免  
固而立桓帝固是月幽斃於獄暴尸道路而胡廣趙戒  
袁湯俱封侯云 桓帝初天下童謠曰小麥青青大麥  
枯誰當穫者婦與姑大夫何在西擊胡吏買馬君具車

請為諸君鼓隴胡按元嘉中涼州諸羌俱反大為民害  
命將出衆每戰常負中國益發甲卒麥多委棄但有婦  
女收穫吏買馬君具車者言調發重及有秩者也請為  
諸君鼓隴胡者不敢公言私咽語 桓帝之初京都童  
謠曰城上烏尾畢逋父為吏子為徒一徒死百乘車車  
班班入河間河間姹女工數錢以錢為室金為堂石上  
慊慊春黃梁梁下有懸鼓我欲擊之丞卿怒按此皆謂  
為政貪也城上烏尾畢逋者處高利獨食不與下共謂

人主多聚斂也父為吏子為徒者言蠻夷將畔逆父既為軍吏其子又為卒徒往擊之也一徒死百乘車者言

前一人往討賊既死矣後又遣百乘車往

臣昭曰志家此釋豈未盡

乎往徒一死何用百乘其後驗意為靈帝作此言一徒似斥桓帝帝貴任羣閣參委機政左右前後莫非刑人有同囚徒之長故言寄一徒也且又弟則廢黜身無嗣魁然單獨非一而何百乘車者乃國之君解犢後徵王膺斯數繼以班班尤得以類焉車班班入河間者言上將崩乘輿班班

入河間迎靈帝也

應劭釋此句云徵靈帝者輪班擁節入河間也

河間姁女工

數錢

一本作妖女

以錢為室金為堂者靈帝既立其母永樂

太后好聚金以為堂也石上慊慊春黃梁者言永樂雖積金錢慊慊常苦不足使人舂黃梁而食之梁下有懸鼓我欲擊之丞卿怒者言永樂主教靈帝使賣官受錢所祿非其人天下忠篤之士怨望欲擊懸鼓以求見丞卿主鼓者亦復諂順怒而止我也 桓帝之初京都童

謠曰游平賣印自有平不辟豪賢及大姓按到延熹之末鄧皇后以譴自殺乃以竇貴人代之其父名武字游平拜城門校尉及太后攝政為大將軍與太傅陳蕃合

心戮力惟德是建印綬所加咸得其人豪賢大姓皆絕

望矣 桓帝之末京都童謠曰茅田一頃中有井四方

纖纖不可整嚼復嚼今年尚可後年饒

風俗通作饒

按易曰

拔茅茹以其彙征吉茅喻羣賢也井者法也時中常侍

管霸等專作威福禁錮黨人茅田一頃者言羣賢衆多

也中有井者言雖阨窮不失法度也四方纖纖不可整

者言姦慝大熾不可整理嚼復嚼者京都飲酒相強之

辭言肉食者鄙不恤王政徒耽宴飲歌呼而已也今年

尚可言但禁錮後年饒者陳寶被誅天下大壞 桓帝  
之末京都童謡曰白蓋小車何延延河間來合諧河間  
來合諧按解犢亭屬饒陽河間縣居無幾桓帝崩使者  
與解犢侯皆白蓋車從河間來延延衆貌也 靈帝之  
末京都童謡曰侯非侯王非王千乘萬騎上北芒按到  
中平六年史侯登躡至尊獻帝未有爵號為中常侍段  
珪等數十人所執公卿百官皆隨其後到河上乃得來  
還此為非侯非王上北芒者也

英雄記曰京都謡歌咸  
言河臘叢進獻帝臘月

生也風俗通曰烏臘烏臘按逆民董卓泊天虐民窮凶極惡關東舉兵欲共誅之轉相顧望莫肯先進處處傳兵數十萬若烏臘蟲相隨橫取之矣

靈帝中平中京都歌曰承樂世董

逃遊四郭董逃蒙天恩董逃帶金紫董逃行謝恩董逃

整車騎董逃垂欲發董逃與中辭董逃出西門董逃瞻

宮殿董逃望京城董逃日夜絕董逃心摧傷董逃

楊孚卓傳

曰卓改按董謂董卓也言雖跋扈縱其殘暴終歸逃竄

至於滅族也

風俗通曰卓以董逃之歌主為已發大禁絕之死者千數靈帝之末禮樂崩壞賞刑

失中毀譽無驗競飾偽服以盡典制遠近翕然咸名後生放聲者為時人有識者竊言舊曰世人次曰俗人今



更曰時人此天促其期也  
其間無幾天下大壞也

獻帝踐阼之初京都童謠

曰千里草何青青十日卜不得生按千里草為董十日

卜為卓凡別字之體皆從上起左右離合無有從下發

端者也今二字如此者天意若曰卓自下摩上以臣陵

君也青青者暴盛之貌也不得生者亦旋破亡獻帝初童謠曰

燕南垂趙北際中央不合大如礪唯有此中可避世公  
孫瓚以為易地當之遂徙鎮焉乃修城積穀以待天下  
之變建安二年袁紹攻瓚大敗縊其姊妹妻子引火自  
焚紹兵趣登臺斬之初瓚破黃巾殺劉虞乘勝南下侵  
據齊地雄威大振而不能開廓遠圖欲以堅  
城觀時坐聽園戮斯亦自易地而去世也

建安初

荊州童謠曰八九年間始欲衰至十三年無子遺言自  
中興以來荊州無破亂及劉表為牧又豐樂至此逮八  
九年當始衰者謂劉表妻當死諸將並零落也十三年  
無子遺言十三年表又當死民當移詣冀州也

千寶搜神記曰

是時華容有女子忽啼呼云有大喪言語過差縣以為  
妖言繫獄百餘日忽於獄中哭曰劉荊州今日死華容  
去州數日即遭馬吏驗視表果死縣乃出之續又歌吟  
曰不意李立為貴人後無幾曹公平荊州以涿郡李立  
字建賢為  
荊州刺史

魏明帝太和中京師歌兇鈴曹子其唱曰其奈汝曹何

此詩妖也其後曹爽見誅曹氏遂衰 景初初童謡曰  
阿公阿公駕馬車不意阿公東渡河阿公來還當奈何  
及宣帝遼東歸至白屋當還鎮長安會帝疾篤急召之  
乃乘追鋒車東渡河終如童謡之言 齊王嘉平中有  
謡曰白馬素羈西南馳其誰乘者朱虎騎朱虎者楚王  
小字也王凌令狐愚聞此謡謀立彪事發凌等伏誅彪  
賜死

吳孫亮初童謡曰吁汝恪何若若蘆葦單衣篋鉤絡於

何相求常子閣常子閣者反語石子垆也鈎絡鈎帶也  
及諸葛恪死果以葦席裹身篋束其腰投石子垆後聽  
恪故吏收斂求之此垆云 孫亮初公安有白鼉

徒何反

鳴童謡曰白鼉鳴龜背平南郡城中可長生守死不去  
義無成南郡城可長生者有急易以逃也明年諸葛恪  
敗弟融鎮公安亦見襲融刮

古剎反

金印龜服之而死鼉

有鱗介甲兵之象又白祥也 孫休永安二年將守質  
子羣聚嬉戲有異小兒忽來言曰三公鋤司馬如又曰

我非人熒惑星也言畢上昇仰視若曳一足練有頃沒  
干寶曰後四年而蜀亡六年而魏廢二十一年而吳平  
於是九服歸晉魏與吳蜀並戰國三公鋤司馬如之謂  
也 孫皓遣使者祭石印山下妖祠使者因以丹書巖  
曰楚九州渚吳九州都揚州士作天子四世治太平矣  
皓聞之意益張曰從太皇帝至朕四世太平之主非朕  
復誰恣虐踰甚尋以降亡近詩妖也 孫皓天紀中童  
謡曰阿童復阿童銜刀遊渡江不畏岸上獸但畏水中

龍武帝聞之加王濬龍驤將軍及征吳江西衆軍無過者而王濬先定秣陵

晉武帝太康元年平吳後江南童謠曰局縮肉數橫目中國當敗吳當復又曰宮門柱且莫朽吳當復在三十年後又曰雞鳴不拊音撫翼吳復不用力於時吳人皆謂

在孫氏子孫故竊發為亂者相繼按橫目者四字自吳亡至元帝興幾四十年元帝興於江東皆如童謠之言

馬元帝懦

乃亂反本作懦

而少斷局縮肉者有所斥也太康

末京洛為折楊柳之歌其曲始有兵革苦辛之辭終以擒獲斬截之事是時三楊貴盛而被族滅太后廢黜幽死中宮折楊柳之應也 惠帝永熙中河內溫縣有人如狂造書曰光光文長大戟為牆毒藥雖行戟還自傷又曰兩火沒地哀哉秋蘭歸形街郵終為人歎及楊駿居內府以戟為衛死時又為戟所害傷楊后被廢賈后絕其膳八日而崩葬街郵亭北百姓哀之也兩火武帝諱蘭楊后字也其時又有童謠曰二月末三月初荆筆

楊板行詔書宮中大馬幾作驢此時楊駿專權楚王用  
事故言荆筆楊板二人不誅則君臣禮悖故云幾作驢

元康中京洛童謠曰南風起吹白沙遙望魯國何嗟

昨何峨

五歌反

千歲髑髏

獨婁二音

生齒牙又曰城東馬子莫

嚙

盧紅反

响

音凶

比至來年纏汝髮南風賈后字也白晉行

也沙門太子小名也魯賈謚國也言賈后将與謚為亂

以危太子而趙王因釁咀

慈呂反

嚼

在爵反

豪賢以成篡奪

不得其死之應也

元康中天下商農通著大郭

諸良反



日時童謡曰屠

音塗

蘇鄆日覆兩耳當見瞎

許轄反

兒作天

子及趙王倫篡位其目實眇焉趙王倫既篡洛中童謡  
曰獸從北來鼻頭汗龍從南來登城看水從西來河灌  
灌數月而齊王成都河間義兵同會誅倫按成都西藩  
而在鄴故曰獸從北來齊東藩而在許故曰龍從南來  
河間水源而在關中故曰水從西來齊留輔政居於宮  
西又有無君心故言登城看也 泰安中童謡曰五馬  
遊渡江一馬化為龍後中原大亂宗藩多絕唯琅邪汝

南西陽南頓彭城同至江東而元帝嗣統矣司馬越還洛有童謠曰洛中大鼠長尺二若不早去大狗至及荀晞將破汲桑又謠曰元超兄弟大落度上桑打椹為荀作由是越惡晞奪其兗州隙難遂構焉愍帝初有童

謠曰天子何在豆田中至建興四年帝降劉曜在城東

豆田壁中建興中江南謠歌曰匄呼宏反如白坑破合

集持作甌音武揚州破換敗吳興覆甌音部甌盧斗反按白者

晉行坑器有口屬甌瓦甌質剛亦金之類也匄如白坑

破者言二都傾覆王室大壞也合集持作甌者元帝鳩  
集遺餘以主社稷未能克復中原但偏王江南故其諭  
也及石頭之事六軍大潰兵人抄掠京邑爰及二宮其  
後三年錢鳳復攻京邑阻水而守相持月餘日焚燒城  
邑井堙音因木刊矣鳳等敗退沈充將其黨還吳興官軍  
踵之蹈藉郡縣充父子授首黨與誅者以百數所謂揚  
州破換敗吳興覆甌甌甌瓦器又小於甌也明帝  
太寧初童謠曰惻惻力力放馬山側大馬死小馬餓高

山崩石自破及明帝崩成帝幼為蘇峻所逼遷於石頭  
御膳不足此大馬死小馬餓也高山峻也又言峻尋死  
石峻弟蘇石也峻死後石據石頭尋為諸公所破復是  
崩山石破之應也 成帝之末又有童謠曰磻磻

苦盡反

何隆隆駕車入梓宮少日而宮車晏駕 咸康二年十  
二月河北謠云麥入土殺石武後如謠言

庾亮初鎮武昌出至石頭百姓於岸上歌曰庾公上  
武昌翩翩如飛鳥庾公還揚州白馬牽旒旒又曰庾

公初上時翩翩如飛鳥庾公還揚州白馬牽旒蘇後  
連徵不入及薨於鎮以喪還都葬皆如謠言

穆帝升平中童兒輩忽歌於道曰阿子聞曲終輒云阿  
子汝聞不無幾而帝崩太后哭之曰阿子汝聞不升  
平末俗間忽作廉歌有扈謙者聞之曰廉者臨也歌云  
白門廉宮庭廉內外悉臨國家其大諱乎少時而穆帝  
晏駕哀帝隆和初童謠曰升平不滿斗隆和那得久  
桓公入石頭陛下徒跣走朝廷聞而惡之改年曰興寧

人復歌曰雖復改興寧亦復無聊生哀帝尋崩升平五年而穆帝崩不滿斗升平不至十年也海西公太和

中百姓歌曰青青御路楊白馬紫遊韁汝非皇太子那

得甘露漿識者曰白者金行馬者國族紫為奪正之色

明以紫間朱也海西公尋廢其三子並非海西公之子

縊

一賜反

以馬韁

君良反

死之明日南方獻甘露焉

太和

末童謠曰犁牛耕御路白門種小麥及海西公被廢百姓耕其門以種小麥遂如謠言海西公初生皇子百

姓歌云鳳凰生一雛天下莫不喜本言是馬駒今定成  
龍子其歌甚美其旨甚微海西公不男使左右向龍與  
內侍接生子以為已子

桓石民為荊州鎮上明百姓忽歌曰黃曇音單子曲中

又曰黃曇英揚州大佛來上明頃之而桓石民死王

忱氏林反

為荊州黃曇子乃是王忱字也忱小字佛大

是大佛來上明也

孝武帝太元末京口謠曰黃雌雞莫作雄父啼一旦去

毛衣衣被拉颯

上廬合反  
下蘇合反

栖尋而王恭起兵誅王國寶

旋為劉牢之所敗故言拉颯栖也

會稽王道子於東府造土山名曰靈秀山無幾而孫恩作亂再踐會稽會稽道子所封靈秀恩之字也

庾楷鎮歷陽百姓歌曰重羅黎重羅黎使君南上無還時後楷南奔殷仲堪在荊州童謠曰芒籠目繩縛腹殷當敗桓當復未幾而仲堪敗桓元遂有荊州

王恭鎮京口舉兵誅王國寶百姓謠云昔年食白飯



今年食麥麪

音孚

天公誅謫汝教汝捻

乃叶反

嚨喉嚨喉

喝

於介反嘶聲

復喝京口敗復敗識者曰昔年食白飯言

得志也今年食麥麪麤穢其精已去明將敗也天  
公將加譴謫而誅之也捻嚨喉氣不通死之祥也敗  
復敗丁寧之辭也恭尋死京都又大行歎疾而喉並  
喝焉 王恭在京口百姓間忽云黃頭小兒欲作賊  
阿公在城下指縛得又云黃頭小人欲作亂賴得金  
刀作蕃扞黃字上恭字頭也小人恭字下也尋如謠

言者焉

安帝隆安中百姓忽作懊懷

上烏浩反  
下奴浩反

之歌其曲曰草

生可攬結女兒可攬擷尋而桓元篡位義旗以三月二

日掃定京都誅之元之宮女及逆黨之家子女妓妾悉

為軍賞東及歐越北流淮泗皆人有所獲故言時則草

可結事則女可擷也桓元既篡童謡曰草生及馬腹烏

啄

丁角反

桓元目及元敗走至江陵時正五月中誅如其

期焉

安帝義熙初童謡曰官家養蘆化為荻

徒歷反

蘆

生不止自成積其時官養盧龍寵以金紫奉以名州養之極也而龍不能懷我好音舉兵內伐遂成讎敵也蘆生不止自成積及盧龍之敗斬伐其黨猶如草木以成積也盧龍據廣州人為之謠曰蘆生漫漫竟天半後擁上流數州之地內逼京輦應天半之言 義熙三年小兒相逢於道輒舉其兩手曰盧健健次曰關歎關歎末曰翁年老翁年老當時莫知所謂其後盧龍內逼舟艦

胡黠反

蓋川健健之謂也既至查浦屢尅期欲與官

鬪鬪歎之應也翁年老羣公有期頤之慶知妖逆之徒自然消殄也其時復有謠言曰盧橙橙直耕反逐水流東風忽如起那得入石頭盧龍果敗不得入石頭也

昔溫嶠令郭景純卜已與庾亮吉凶景純云元吉嶠語亮曰景純每筮是不敢盡言吾等與國家同安危而曰元吉是事有成也於是協同討滅王敦

苻生時長安謠曰東海大魚化為龍男便為王女為

公問在何所洛門東生誅其侍中太師魚遵及其子  
孫後苻堅殺生而代之堅封東海時為龍驤將軍第  
在洛門東 苻堅初童謠曰阿堅牽連三十年後若  
欲敗時當在江湖邊及堅在位凡三十年敗於淝水  
是其應也又謠語云河水清復清苻堅死新城及堅  
為姚萇所殺於新城復謠歌云魚羊田斗當滅秦識  
者以為魚羊鮮也田斗卑也堅自號秦言滅之者鮮  
卑也其羣臣諫堅令盡誅鮮卑不從及淮南敗還初

為慕容冲所攻卒為姚萇所殺

梁武帝天監三年六月八日武帝講於重雲殿沙門誌公忽然儻歌樂須臾悲泣因賦五言詩樂哉三十餘悲哉五十裏但看八十三子地祲災起佞臣作欺妄賊臣滅君子若不信吾語龍時候賊起且至馬中間銜悲不見喜梁自天監至於大同三十餘年江表無事至太清二年臺城陷帝享國四十八年所言五十裏也太清元年八月十三而侯景自懸瓠來降在丹陽之北子地帝

惑朱异之言以納景景之作亂始自戊辰之歲至午年  
帝憂崩 十年四月八日誌公於大會中又作詩曰兀  
尾狗子始着狂欲死不死齧人傷須臾之間自滅亡患  
在汝陰死三湘橫尸一旦無人藏侯景小字狗子初自  
懸瓠來降懸瓠則古之汝南也巴陵南有地名三湘即  
景奔敗之所 天監中茅山隱士陶弘景為五言詩曰  
夷甫任散誕平叔坐談空不意昭陽殿忽作單于宮及  
大同之季公卿唯以談元為務夷甫平叔朝賢也侯景

作亂遂居昭陽殿 大同中童謡曰青絲白馬壽陽來  
其後侯景破丹陽乘白馬以青絲為羈勒 梁末童謡  
云可憐巴馬子一日行千里不見馬上郎但見黃塵起  
黃塵汙人衣阜英相料理及僧辯滅羣臣以謡言奏聞  
曰僧辯本乘巴馬以擊侯景馬上郎王字也塵謂陳也  
而不解阜英之謂既而陳滅於隋說者謂江東謂殺羊  
角為阜英隋氏姓楊楊羊也言終滅於隋云

陳初有童謡曰黃班青驄馬發自壽陽溪來時冬氣未



去日春風始其後陳主果為韓擒虎所敗擒本名擒虎  
黃班之謂也破建康之始復乘青驄馬徃反時節皆相  
應 時江南盛歌王獻之桃葉之詞桃葉復桃葉度江  
不用楫但度無所苦我自迎接汝晉王伐陳之始置營  
桃葉山下及韓擒虎渡江大將任蠻奴至新林以導北  
軍之應 後主造齊雲觀國人歌之曰齊雲觀寇來無  
際畔功未畢而為隋師所虜 禎明初後主作新歌詞  
甚哀怨令後宮美人習而歌之其辭曰玉樹後庭花花

開不復久時人以歌識此其不久兆也 後主在東宮  
時有婦人突入唱曰畢國主有鳥一足集其殿庭以嘴  
畫地成文曰獨足上高臺盛草變為灰欲知我家處朱  
門當水開解者以為獨足者蓋指後主獨行無衆盛草  
言荒穢隋承火運草得火而灰及至京師與家屬館於  
都水臺所謂上高臺當水也其言皆驗

東魏孝靜武定中有童謠云百尺高竿摧折水裏燃燈  
澄滅高者齊姓也澄文襄名五年神武崩摧折之應七

年文襄遇盜所害澄滅之徵也

北齊神武始移都於鄴時有童謠曰可憐青雀子飛入  
鄴城裏作窠猶未成舉頭失鄉里寄書與婦母好看新  
婦子魏孝靜帝清河王之子也后則神武之女鄴都宮  
室未備即逢禪代作窠未成之效也孝靜尋崩文宣以  
后為太原長公主降於楊愔時婁后尚在故言寄書與  
婦母新婦子者斥后也 文宣天保中陸法和入國書  
其屋壁曰十年天子為尚可百日天子急如火周年天

子迭代坐時文宣帝享國十年而崩廢帝嗣立百餘日用替厥位孝昭即位一年而崩此其效也 又童謠曰

一東藁兩頭然河邊殺雛飛上天藁然兩頭於文為高河邊殺雛為水邊洋指文宣名也 後主武平元年童

謠曰狐截尾你欲除我我除你其年四月隴東王胡長仁謀遣刺客殺和士開事露反為士開所諧死 二年

童謠曰和士開七月三十日將你向南臺小兒唱訖一時拍手云殺却至七月二十五日御史中丞琅邪王儼

執士開送於南臺而斬之是歲又有童謠曰七月刈禾  
傷早九月喫餹正好十月洗蕩飯瓮十一月出却趙老  
七月士開被誅九月琅邪王遇害十一月趙彥深出為  
西兗州刺史 武平末童謠曰黃花勢欲落清罇但滿  
酌時穆后母子淫僻干預朝政時人患之穆后小字黃  
花尋逢齊亡欲落之應也 鄴中又有童謠曰金作掃  
帚玉作杷淨掃殿屋迎西家未幾周師入鄴

後周初有童謠曰白楊樹頭金鷄鳴祇有阿舅無外甥

靜帝隋氏之甥既遜位而崩諸舅強盛 宣帝與宮人  
夜中連臂蹋蹠而歌曰自知身命促把燭夜行遊帝即  
位二年而崩

隋文帝開皇十年高祖幸并州宴秦孝王及王子相帝  
為四言詩曰紅顏詎幾玉貌須臾一朝花落白髮難除  
明年後歲誰有誰無明年而子相卒十八年而秦孝王  
薨 煬帝大業十一年帝自京師如東都至長樂宮飲  
酒大醉因賦五言詩其卒章句曰徒有歸飛心無復因

風力令美人再三吟詠帝泣下霑襟侍御者莫不歎歔  
帝因幸江都復作五言詩曰求歸不得去真成遭箇春  
鳥聲爭勸酒梅花笑殺人帝以三月被弒即遭春之應  
也是年盜賊蜂起道路隔絕帝懼遂無還心帝復夢二  
豎子歌曰住亦死去亦死未若乘船渡江水由是築宮  
丹陽將居焉功未就而帝被殺 大業中童謠曰桃李  
子鴻鵠遶陽山宛轉花林裏莫浪語誰道許其後李密  
坐楊元感之逆為吏所拘在路逃叛潛結羣盜自陽城

山而來襲破洛口倉後復屯兵苑內莫浪語密也宇文  
化及自號許國尋亦破滅誰道許者蓋驚疑之亂也

唐竇建德未敗時有謠曰豆入牛口勢不得久 太宗

貞觀十四年交河道行軍大總管侯君集伐高昌先是  
其國中有童謠曰高昌兵馬如霜雪漢家兵馬如日月

日月照霜雪回首自消滅 高宗永徽後民歌武媚娘

曲 永徽末里歌有桑條韋也女時韋也樂 龍朔中

時人飲酒令曰子母相去離連臺拗倒俗謂杯盤為子



母又名盤為臺又里歌有突厥鹽 高宗自調露中欲  
封嵩山屬突厥叛而止後又欲封以吐蕃入寇遂停時  
童謠曰嵩山凡幾層不畏登不得但恐不得登三度徵  
兵馬傍道打騰騰 調露初京城民謠有側堂堂橈堂  
堂之言太常丞李嗣真曰側者不正橈者不安自隋以  
來樂府有堂堂曲再言堂者唐再受命之象 永淳元  
年七月東都大雨人多殍殍先是童謠曰新禾不入箱  
新麥不入場迨及八九日狗吠空垣墻 永淳後民歌

曰楊柳漫頭駝 武后垂拱後東都有契苾兒歌皆淫  
艷之詞契苾張易之小字也 如意初里歌曰黃麋黃  
麋草裏藏彎弓射爾傷其後王孝傑敗於黃麋谷 中  
宗神龍以後民謠曰山南烏鵲窠山北金駱駝鑿柯不  
鑿孔斧子不施柯山南唐也烏鵲窠者人居寡也山北  
胡也金駱駝者虜獲而重載也 安樂公主於洛州造  
安樂寺童謠曰可憐安樂寺了了樹頭懸 景龍中民  
謠曰黃牸犢子挽紉斷兩足踏地鞮羈斷城南黃牸犢

子韋又有阿緯娘歌時又謠曰可憐聖善寺身著綠毛  
衣牽來河裏飲踏殺鯉魚兒 元宗在潞州有童謠曰  
羊頭山北作朝堂 天寶中有術士李遐周於元都觀  
院廡間為詩曰燕市人皆去函關馬不歸人逢山下鬼  
環上繫羅衣而人皆不悟近詩妖也 又祿山未反時  
童謠曰燕燕飛上天天上女兒鋪白氍毹上有千錢  
時幽州有謠曰舊來誇戴竿今日不堪看但看五月裏  
清水河邊見契丹 德宗時或為詩曰此水連涇水雙

昨血滿川青牛逐朱虎方號太平年近詩妖也 朱泚  
未敗前兩月有童謠曰一隻筋兩頭朱五六月化為胆  
憲宗元和初童謠曰打麥打麥三三三乃轉身曰舞  
了也 宣宗大中末京師小兒疊布漬水紐之向日謂  
之曰拔暈 懿宗咸通七年童謠曰草青青被嚴霜鵲  
始復看顛狂 十四年成都童謠曰咸通癸巳出無所  
之蛇去馬來道路稍開頭無片瓦地有殘灰是歲歲陰  
在巳明年在午巳蛇也午馬也 僖宗時童謠曰金色

蝦蟆爭弩眼翻却曹州天下反 乾符六年童謠曰八月無霜寒草青將軍騎馬出空城漢家天下西巡狩猶向江東更索兵 中和初童謠曰黃巢走泰山東死在翁家翁

宋仁宗皇祐中廣源蠻酋儂智高反陷邕州時謠言曰農家種糴家收後宣徽使狄青討平之 高宗紹興中鼎澧劇盜夏誠劉衡二寨據險不可破二盜有口占末云除是飛過洞庭湖後卒為岳飛所破 二年李綱帥

長沙道過建寧有僧宗本題於邑治之壁曰東燒西燒  
日月七七後數日江西盜李敦仁入竟焚其邑乃七月  
七日也 二十五年春秦熺謁告建康遊茅山題詩版  
揭於華陽觀梁間是晚視之其側隱隱有白字可識末  
云榮華富貴三春夢顏色馨香一土堆是冬檜死 孝  
宗淳熙中河決入汴梁宋間為之語曰黃河災天水來  
天水國姓也遺黎以為恢復之兆時淮西競歌汪秀才  
曲曰騎驢渡江過江不得又為獠舞以和之後舒城狂

生汪格謀不軌州兵入其家縛之其子拒殺聚惡少數  
千為亂聲言渡江事平格亦伏誅 七年正月行都餘  
杭門外墻壁有詩其言頗涉恠後廉得主名杖遣之主  
管城北廂劉君暨以失察異言坐削秩其詩不錄 十  
四年都城市井歌曰汝亦不來我家我亦不來汝家流  
傳四方莫詳其指過紹熙二三年其事始應於兩宮

淳熙末上以恢復之占訪莎衣道人何者何授以歌詞  
末云兒孫死鬧啾啾也須還我一百州後金主葛王死

其孫璟立不以序諸王爭立內亂志士以撫機為惜

光宗紹熙三年都城市井有取程頤語錄語雜以穢褻盛行於市朝廷知而禁之後三年偽學之禍乃作 寧

宗慶元四年三月甲辰有郵簡置詩謠達御前者上諭宰臣究其事詩亦不錄 嘉泰四年越人盛歌鐵彈子

白塔湖曲是冬有盜金十一者號鐵彈子聚眾剽掠不可制賊黨稍平謬傳其鬪死白塔湖中帥臣以聞後復出獲之諸暨縣始就僇 開禧二年鄂州民謠塞上將



軍少城南從事多宣威不可問恢復竟如何時權臣開  
邊鄂為宣撫使置司多辟親故幕賓聚城南為酣縱云  
嘉定三年都城市井作歌詞末皆曰東君去後花無  
主朝廷惡而禁之未幾景獻太子薨

文獻通考卷三百九

欽定四庫全書

文獻通考卷三百十

鄱陽馬端臨貴與著

物異考十六

訛言

漢成帝建始三年十月丁未京師相驚言大水至渭水

虎上小女陳持弓年九歲

師古曰虎上地名也音斯

走入橫城門入

未央宮尚方掖門殿門門內諸衛戶者莫見至句盾禁

中而覺得

師古曰句盾少府之署覺得事覺而見執得也

民以水相驚者陰氣

盛也小女而入宮殿中者下人將因女寵宮室之象也

名曰持弓有似周家繫弧之祥易曰弧矢之利以威天

下

師古曰下繫之辭也

是時帝母王太后弟鳳始為上將秉國政

天知其後將威天下而入宮室故象先見也其後王氏

兄弟父子五侯秉權至莽卒篡天下蓋陳氏之後云京

房易傳曰妖言動衆茲謂不信路將亡人司馬死成

帝綏和二年八月庚申鄭通里男子王褒

師古曰鄭縣之通里衣

絳衣小冠帶劔之北司馬門殿東門

師古曰入北司馬門又入殿之東門

也

上前殿入非常室中

如淳曰殿上室名

解帷組結佩之

師古曰組

綬類所以繫帷又垂以為飾也佩帶之

招前殿署長業等曰天帝令我居

此業等收縛考問褒故公車大誰卒

應劭曰在司馬殿門掌誰呵者也服

虔曰衛士之師也著樊噲冠師古曰大誰者主問非常之人云姓名是誰也而應氏乃以謹諱為義云大誰呵不當厥理後之學者輒改此書誰字為謹違本文矣大誰本以誰何稱因用名官有大誰長今此卒者長所領士卒

病狂易

師古曰謂病狂而變易其常也

不自知入宮狀下獄死是

時王莽為大司馬哀帝即位莽乞骸骨就第天知其必

不退故因是而見象也姓名章服甚明徑上前殿路寢  
入室取組而佩之稱天帝命然時人莫察後莽就國天  
下究之哀帝徵莽還京師明年帝崩莽復為大司馬因是  
而篡國 哀帝建平四年正月民驚走持橐或橄一枚

如淳曰橄麻幹也師古曰橐木桿也音工老反橄音鄒又則久反

傳相付與曰行詔籌

道中相過逢多至千數或被髮徒踐

師古曰徒踐謂徒跣也

或夜

拆關或踰墻入或乘車騎奔馳以置驛傳行經歷郡國  
二十六至京師其夏京師郡國民聚會里巷阡陌設張

博具

師古曰博戲之具

歌舞祠西王母又傳書曰母告百姓佩

此書者不死不信我言視門樞下當有白髮

師古曰樞門扇所由

開閉者也音昌于反

至秋止是時帝祖母傳太后驕與政事

師古曰與

讀曰豫

故杜鄴對曰春秋災異以指象為言語籌所以紀

數民陰水類也水以東流為順走而西行反類逆上象

數度放溢妄以相予違忤民之心也西王母婦人之稱

博奕男子之事於街巷阡陌明離闌內

師古曰闌門也音魚列反

與疆外

師古曰與讀曰豫

臨事盤樂亢陽之意白髮衰年之象

體尊性弱難理易亂門人之所由樞其要也居人之所  
由制持其要也其明甚著今外家丁傳並侍帷幄布於  
列位有罪惡者不坐辜罰亡功能者畢受官爵皇甫三

桓詩人所刺春秋所譏亡以甚此

師古曰皇甫周卿士之字也周后嬖寵而

處職位詩刺之事見小雅十月之交篇

指象昭昭以覺聖朝柰何不應後

哀帝崩成帝母王太后臨朝王莽為大司馬誅滅丁傳  
一曰丁傳所亂者小此異乃王太后莽之應云

按訛言惟唐史志置之詩妖之後諸史皆無之惟



錯見於言不從及人病條下今撮取其語言之妖  
異類世俗所謂語讖者立訛言一門云

王莽始建國元年長安狂女子碧呼道中

碧女子名也曰

高皇帝大怒趣歸我國不者九月必殺汝莽收捕殺  
之二年十一月立國將軍建奏今月癸酉不知何

一男子遮臣建車前自稱漢氏劉子興成帝下妻子

也

下妻猶小妻

劉氏當復趣空宮

趣音促

收繫男子即常安

姓武字仲大逆無道請論如法 天鳳元年民訛言

黃龍墮死黃山宮中百姓奔走往觀者有萬數莽惡

之

師古曰莽自謂黃德故惡此妖

捕繫問語所從起不能得

後漢安帝永初元年十一月民訛言相驚司隸并冀州  
民人流移時鄧太后專政婦人以順為道夫死從子今  
專主王事此不從而僭也 靈帝熹平二年六月雒陽  
民訛言虎賁寺東壁中有黃人形容鬚眉良是觀者數  
萬省中悉出道路斷絕到中平元年二月張角兄弟起兵  
冀州自號黃天三十六方四面出師將帥星布吏士外

屬因其疲餒幸而勝之 光和元年五月壬午何人白  
衣欲入德陽門辭我梁伯夏教上殿為天子中黃門桓  
賢等呼門吏僕射欲收縛須臾還走求索不得不知姓  
名蔡邕以為類成帝時男子王褒入宮事以往况今將  
有狂狡之人欲為王氏之謀其事不成其後張角稱黃  
天作亂竟破壞應劭曰尚書春秋左傳伯益佐禹治水  
封於梁颺叔安有裔子曰董父帝舜賜姓董氏董氏之  
祖與梁同焉其後董卓自外入廢帝殺后梁本安定而

卓隴西人俱涼州也袁山松曰張角一時狡亂不足致此大異斯乃曹氏滅漢之證梁即魏地之名伯夏明於中夏非溥天之稱後主嗣位譙周曰先主諱備其訓具也後主諱禪其訓授也若言劉已具矣當授與人甚於晉穆侯漢靈帝命子之祥也蜀果亡

魏齊王嘉平中東郡有訛言云白馬河出妖馬夜過官牧邊嗚呼衆馬皆應明日言其跡大如斛行數里還入河楚王彪本封白馬兗州刺史令狐愚與王凌謀共立

之事泄俱死

晉惠帝永寧初齊王冏唱義兵誅亂逆乘輿反正忽有婦人詣大司馬門求寄產門者詰之婦曰我截臍便去耳其後冏果斬戮永寧元年十二月甲子有白頭公入齊王冏大司馬府大呼曰有大兵起不出甲子冏殺之明年十二月戊辰冏敗即甲子旬也泰安元年四月癸酉有人自雲龍門入殿前北面再拜曰我當作中書監即收斬之千寶以為禁庭尊秘之處今賤人逕

入而門殿不覺者宮室將虛而下人踰上之妖也是後  
帝北遷鄴又遷長安宮闕遂空焉 元帝永昌元年大  
將軍王敦下據姑孰百姓訛言蟲病食人大孔數日入  
腹入腹則死療之有方當得白犬膽以為藥自淮泗遂  
及京都數日之間百姓驚擾人人皆自云已得蟲病又  
云始在外時當燒鐵以灼之於是翕然被燒灼者十七  
八矣而白犬暴貴至相請奪其價十倍或有自云能行  
燒鐵灼者賃灼百姓日得五六萬億而後已四五日漸

靜說曰夫裸蟲人類而人為主今云蟲食人言本同  
臭類而相殘賊也自下而上明其逆也必入腹者言害  
由中出不由外也犬有守衛之性白者金色而膽用武  
之主也帝王之運王霸會於戊戌主用兵金者晉行火  
燒鐵以療疾者必去其類而來火與金合德共除蟲害  
也按中興之際大將軍本以腹心受伊呂之任而元帝  
末年遂攻京邑明帝諒闇又有異謀是以下逆上腹心  
內爛也及錢鳳沈充等逆兵四合而為王師所挫踰月

而不能濟水北中郎劉遐及淮陵內史蘇峻率淮泗之衆以救朝廷故其謠言首作於淮泗也朝廷卒以弱制強罪人授首是用白犬膽可救之效也海西公時庾晞四五年中喜為挽歌自搖大鈴為倡使左右齊和又譙會輒令倡伎作新安人歌舞離別之辭其聲悲切時人怪之後亦果敗孝武帝太元中小兒以兩鐵相打於土中名曰鬪族後王國寶王孝伯一姓之中自相攻擊也



桓元初改年為大亨遐邇譴音言曰二月了故義謀以仲春發也元篡立又改年為建始以與趙王倫同又易永始永始復是王莽受封之年也

苻堅時有人於明光殿大呼曰甲申乙酉魚羊食人悲哉無復遺堅命執之俄而不見祕書監朱彤等因請誅鮮卑堅不從也

宋明帝時訛言東城天子出其後建安王休仁鎮東府帝懼殺休仁而常閉東府不居明帝又屢幸改代作伐

以厭王氣又使子安成王代之及蒼梧王敗安成王代立咸言為驗術數者推齊高祖舊居武進東城村東城之言其在此也

齊武帝時文惠太子立樓館於鍾山下號曰東田太子屢游幸之東田反語為顛童也武帝又於青溪立宮號曰舊宮反之窮廐也至鬱林王果以輕狡而至於窮又武帝時小史姓皇名太子武帝曰皇太子非名之謂於是移點於外易名犬子處士何點曰太子者天地之

所懸三才之所繫今化而為犬不得立矣既而文惠太子薨鬱林海陵相繼廢黜此其驗也 文惠太子與才

人共賦七言詩句後輒云愁和帝至東昏以暴虐殞南康王寶融即位禪於梁以弑殞諡和帝其言乃驗焉

梁武帝天監十三年六月都下訛言有棖棖取人肝肺及血以飴天狗百姓大懼二旬而止 大通五年十二月都下訛言天子取人肝以飴天狗大小相警日晚便閉門持杖數月乃止

武陵王紀僭帝位建元曰天正永豐侯蕭撝曰王不克矣昔桓元年號大亨有識者以為二月了而元之敗實在仲春今日天正正之為文一止其能久乎果一年而敗

陳後主時諸省官人多稱省主北齊末亦有此稱識者以為主將見省之兆未幾國亡

北齊文宣帝太子殷當冠詔令邢子才為制字子才字之曰正道帝曰正一止也吾兒其替乎子才請改帝不

許曰天也後卒為常山王所廢殺 武成河清三年晉  
陽訛言有鬼兵百姓競擊銅鐵以捍之 後主武平七  
年為周師所敗走至鄴自稱太上皇傳位太子恒改元  
隆化時人離合其字曰降死竟降周而死

周武帝改元為宣政梁主蕭歸離合其字為宇文弋日  
其年六月帝崩

隋文帝開皇初梁主蕭琮改元廣運江陵父老相謂曰  
運之為字軍走也吾君當為軍所走乎後琮朝京師被

拘留不反梁國遂廢文帝名皇太子曰勇晉王曰英  
秦王曰俊蜀王曰秀開皇初有人上書言勇者一夫之  
用又千人之秀為英萬人之秀為俊斯乃布衣之美稱  
非帝王之嘉名也帝不省時人呼楊性多為羸者或言  
於上曰楊英反為羸殃帝不憚遽改之其後勇俊秀皆  
被廢煬帝終失天下為楊氏之殃煬帝改元大業  
識者惡之曰於字離合為大苦來也尋而天下喪亂率  
土遭荼炭之酷

唐太宗貞觀十七年七月民訛言官遣棖棖殺人以祭  
天狗云其來也身衣狗皮鐵爪每於闇中取人心肝而  
去於是更相震怖每夜驚擾皆引弓劔自防無兵器者  
剡竹為之郊外不敢獨行太宗惡之令通夜開諸坊門  
宣旨慰諭月餘乃止 武后時民飲酒謳歌曲終而不  
盡者謂之族鹽 元宗開元二十七年十月改作東都  
明堂訛言官取小兒埋明堂下以為厭勝村野兒童藏  
於山谷都城騷然或言兵至元宗惡之遣使慰諭久之

乃止 天寶三載二月辛亥有星如月墜於東南墜後  
有聲京師訛言官遣棖棖捕人取肝以祭天狗人頗恐  
懼畿內尤甚遣使安諭之與貞觀十七年占同 天寶  
後詩人多為憂苦流寓之思及寄興於江湖僧寺而樂  
曲亦多以邊地為名有伊州甘州涼州等至其曲遍繁  
聲皆謂之入破又有胡旋舞本出康居以旋轉便捷為  
巧時又尚之破者蓋破碎云 德宗建中三年秋江淮  
訛言有毛人食其心人情大恐 朱泚既僭號名其舊



第曰潛龍宮移內府珍貨實之占者以為易稱潛龍勿用此敗祥也 文宗太和九年京師訛言鄭注為上合金丹生取小兒心肝密旨捕小兒無算徃徃陰相告曰某處失幾兒矣方士言金丹可致神仙蓋誕妄不經之語或信而服之則發熱多死如其所戒云小兒無辜者取其心肝將有殺戮象 劉從諫未死時潞州有狂人折腰於市曰石雄七千人至矣從諫捕斬之 懿宗咸通十四年秋成都訛言有獫母鬼夜入人家民皆恐夜

則聚坐或曰某家見鬼眼晃然如燈焰民益懼 黃巢

未入京師時都人以黃米及黑豆屑蒸食之謂之黃賊  
打黑賊 僖宗時里巷鬪者激怒言任見右廂天子

晉高祖天福中兩浙兒童聚戲率以趙字為語助如言  
得曰趙得可曰趙可自是一國之人語言無不以趙字  
兼之者及晉末趙延壽貴盛浙人謂必應識後延壽為  
契丹所繫而謠言益盛洎太祖受禪始悟焉 天福末

宣州太平縣掘地得石記云天子冀州人時李景據江

表名子曰冀欲當之及太祖開統方悟冀州趙地也

出帝開運末宋州宋城縣有異僧常挾彈持銅丸走榛莽中如飛指其地曰不二十年當有帝王由此建號

後周太祖廣順初江南伏龜山圯得石函長二尺廣八寸中有鐵銘云維天監十四年秋八月葬寶公於銘背有引曰寶公嘗為此偈大書於版白巾冪之人欲讀者必施數錢乃得讀訖即冪之是時名臣陸倕王筠姚察而下皆莫知其旨或問之云在五百年後至卒乃鑄其

偁同葬焉銘曰莫問江南事江南自有憑乘雞登寶位  
跨犬出金陵子建司南位安仁秉夜燈東隣家道闕隨  
虎遇明興其字皆小篆體勢完具徐鉉徐鉉韓熙載皆  
不能解及煜歸朝好事者云煜以丁酉年生辛酉年襲  
位即雞也開寶八年甲戌江南國滅是跨犬也當王師  
圍其城而曹彬營其南是子建司南位也潘美營其北  
是安仁秉夜燈也其後太平興國戊寅歲淮海王錢俶  
舉國入覲即東隣也家道闕者意無錢也隨虎戊寅年

也 世宗顯德六年二月癸巳有一人敝衣冠闌入中書升政事堂據床而坐堂吏叱之曰何人遣爾至此其人曰宋州官家教我來此吏具白其事於宰臣宰臣密令遣之尋不知所適其年六月十九日世宗崩明年正月四日大宋受命

荆南高從誨鑿池於山亭下得石匣長尺餘局鐫甚固從誨神之屏左右焚香啟匣中得石有文云此去遇龍即歇及建隆中從誨孫繼冲入朝改鎮徐州龍

隆音相近

宋太祖建隆中京師士庶及樂工少年競唱歌曰五來  
子聲調清逸徧於里巷自建隆至開寶凡平荆湖川廣  
江南五國而中原混一矣時西川孟昶賦歛無度射利  
之家配率尤甚既乏緡錢唯仰在質物乃競書簡扎揭  
於門曰今召主收贖又每歲除日命翰林為詞題桃符  
正旦置寢門左右末年學士辛寅遜撰詞昶以其非工  
自命筆題新年納餘慶嘉節號長春昶以其年正月十

一日降王師即命呂餘慶知成都府而長春乃太祖誕  
聖節名也召與趙贖與蜀同音 開寶初廣南劉鋹令  
民家置貯水桶號防火大桶又鋹末年童謠曰羊頭二  
四白天雨至後王師以辛未年二月四日擒鋹識者以  
為國家以火德王房為宋分羊未神也雨者王師如時  
雨之義也防與房桶與統同音 太宗太平興國中京  
師童兒以木雕合子中有竅藏掖下蹙之有聲號為掖  
底鬧後盧多遜有罪投荒人以為讖其在肘掖而干國

典也 雍熙中京師人破竹為細縷以五色紙為胡蝶  
綴其杪兩兩相對手撚之遞相飛觸謂之鬪胡蝶其後  
河朔頻歲用兵 真宗天禧二年五月西京民訛言有  
物如烏帽夜飛入人家又變為犬狼狀攫人民多恐駭  
每夕重閉深處至持兵器驅逐者六月乙巳傳及京師  
云能食人里巷聚族環坐叫噪達曙軍營中尤甚而實  
無狀意其妖人所為有詔嚴捕得數輩訊之皆非 仁  
宗皇祐五年正月戊午狄青敗儂智高於歸仁鋪初謠



言農家種糴家收至是智高果為青所破 徽宗政和  
七年詔修神保觀俗所謂二郎神者京師人素畏之自  
春及夏傾城男女負土以獻揭榜通衢云某人獻土又  
有飾形作鬼使巡門催納土者或謂蔡京曰獻土納土  
非佳語也後數日有旨禁絕 宣和六年御樓觀燈時  
開封尹設次以彈壓於西觀下上從六宮於其上以觀  
天府之斷決者簾幕深密下無由知衆中忽有人躍出  
墨色布衣若寺僧童行狀以手畫簾出指斥語執於觀

下上怒甚令中使傳旨治之箠掠亂下又加炮烙詢其誰何略不一語亦無痛楚之狀又斷其足筋俄施刀鬻血肉狼籍上大不悅為罷一夕之懼竟不得其何人付獄盡之 七年八月有都城東門外鬻菜夫至宣德門下忽若迷罔釋荷擔向門戟手出悖詈語且曰太祖皇帝神宗皇帝使我來道尚宜速改也邏卒捕之下開封獄一夕方省則不知向之所為者乃於獄中盡之 高宗建炎二年十一月駐蹕揚州郊祀後數日有狂人具

衣冠執香爐携絳囊拜於行宮門外自言天遣我為官  
家兒書於囊紙刻於右臂皆是語鞠之不得姓名上以  
其狂釋不問明年二月金人下維揚三月有明受之變

紹興元年四月庚辰閬州有狂僧緣經哭於郡譙門  
曰今日佛下世且言且哭實隆祐太后上仙日云閬距  
行都萬里逾月而遺詔至十二月越州連有火後民訛  
言相驚十六日當再有火樞密院以軍法禁之乃定

孝宗淳熙十四年正月紹興府有狂人突入恩平郡王

第升堂踐王座曰我太上皇孫來報訃音鞠訊終不語  
是冬高宗晏駕明年八月王薨 光宗紹熙元年三月  
行都市人夜以殺相驚奔進者久乃定與漢志永初民  
相驚同占 二年十二月庚寅昧爽成都府有人縗服  
入帳門大呼閫帥京鎧姓名後八年鎧薨相位蓋慶元  
六年前五日光宗晏駕後四日皇子冲溫邵王薨時慈  
懿皇后梓宮在殯 寧宗慶元六年十月瓊州訛言妖  
星流墮民舍郭七家聲如雷通守曾丰瓊山縣令移文

往復民獠驚喧後皆坐黜 嘉泰二年六月故循王張  
俊家火後旬日市井訛言相驚有絳衣婦人為火殃下  
墜都民皆徙避晝夜不遑寧處此訛言也禁之後亦不  
火

服妖

春秋左氏傳閔公二年晉獻公使太子申生出師公衣

之偏衣

謂左右異色其半象公之服

佩之金玦

半環曰玦以金為之

狐突歎曰

時事之徵也衣身之章也佩衷之旗也

旗表也衣所以明貴賤佩所以

表中故敬其事則命以始賞以春夏服其身則衣之純壹其色

用其衷則佩之度佩玉者君今命以時卒閔其事也卒盡

也閔閉也謂十衣以危服遠其躬也危雜色謂偏衣也佩以金

玦棄其衷也服以遠之時以閔之危涼冬殺金寒玦離

胡可恃也涼薄也危色不能純故曰薄也冬主殺氣梁

餘子養曰帥師者受命於廟受服於社有常服矣御軍常服

則韋弁弗獲而危命可知也死而不孝不如逃之罕夷曰

危奇無常金玦不復君有心矣奇奇怪非常意復反也金玦猶決去不復反意

也有心言有害太子後四年申生以讒自殺近服妖也之心也復扶目反

鄭子臧好聚鵠冠

鵠今翠鳥

鄭文公惡之使盜殺之劉向

以為近服妖也

漢昭帝時昌邑王賀遣中大夫之長安多治仄注冠

應劭

曰今法冠是也李奇曰一曰高山冠本齊冠也謁者服之師古曰仄古側字也謂之側注者言形側立而下注

也蔡邕云高九寸鐵為卷非法冠及高山也卷音去權反

以賜大臣又以冠奴劉向

以為近服妖也時王賀狂悖

師古曰悖惑也音布內反

聞天子不豫

師古曰言有疾不悅豫也周書顧命曰王有疾不豫

弋獵馳騁如故與騶奴宰人

游居娛戲驕慢不敬

師古曰騶廐御也宰人主膳者也娛樂也戲音嬉

冠者尊

服奴者賤人賀無故好作非常之冠暴尊象也以冠奴

者當自至尊墜至賤也

師古曰墜墜也音直類反

其後帝崩無子漢

大臣徵賀為嗣即位狂亂無道縛戮諫者夏侯勝等於

是大臣白皇太后廢賀為庶人賀為王時又見大白

狗冠方山冠而無尾

鄧展曰方山冠以五采穀為之樂舞人所服

此服妖亦

犬豕也賀以問郎中令龔遂遂曰此天戒言在仄者盡

冠狗也

師古曰言王左右侍側之人不識禮義若狗而著冠者耳冠音工喚反其下亦同

去之



則存不去則亡矣賀既廢數年宣帝封之為列侯復有

罪死不得置後又犬豕無尾之效也京房易傳曰行不

順厥咎人奴冠天下亂辟無適

如淳曰辟君也適適子也師古曰辟音壁適讀

嫡曰妾子拜

如淳曰無適子故也

又曰君不正臣欲篡厥妖狗冠出

朝門 成帝鴻嘉永始之間好為微行出游選從期門

郎有材力者及私奴客多至十餘少五六人皆白衣袒

幘

師古曰袒幘不加上冠

帶持弓劒或乘小車御者在茵上

蘇林曰茵

車上尊也御者錯亂更在茵上坐也師古曰車小故御者不得迴避而在天子茵上也茵音因

或皆騎

出入市里郊埜遠至旁縣大臣車騎將軍王音及劉向等數以切諫谷永諫曰陛下棄萬乘之至尊樂家人之賤事離深宮之固挺身獨與小人晨夜相隨烏集醉飽吏民之家亂服共坐溷肴亡別典門戶奉宿衛之臣執干戈衛空宮公卿百僚不知陛下所在積數年矣

後漢更始諸將軍過雒陽者數十輩皆幘而衣婦人衣繡擁髻時智者見之以為服之不衷身之災也乃奔入邊郡避之是服妖也其後更始為赤眉所殺 桓帝元

嘉中京都婦女作愁眉啼粧墮馬髻折腰步齟齬笑所謂愁眉者細而曲折啼粧者薄拭目下若啼處墮馬髻

者作一邊

梁冀別傳曰冀婦女又有不聊生髻

折腰步者足不在體下齟

齬笑者若齒痛樂不欣欣始自大將軍梁冀家所為京都翕然諸夏皆倣效此近服妖也梁冀二世上將婚媾王室大作威福將危社稷天戒若曰兵馬將往收捕婦女憂愁蹙眉啼泣吏卒掣頓折其腰脊令髻傾邪雖強語笑無復氣味也到延熹二年舉宗誅夷延熹中梁

冀誅後京都憤顏短耳長短上長下時中常侍單超左  
官徐璜具瑗唐衡在帝左右縱其姦慝海內愠曰一將  
軍死五將軍出家有數侯子弟列布州郡賓客雜襲騰  
翥上短下長與梁冀同占到其八年桓帝因日蝕之變  
乃拜故司徒韓續為司隸校尉以次誅鉏京都正清臣昭

按本傳續誅左官貶具瑗雖尅折姦首羣閹相蒙京都未為正清

延熹中京都長者

皆著木屐婦女始嫁至作漆畫五綵為系此服妖也到  
九年黨事始發傳黃門北寺臨時惶惑不能信天任命

多有逃走不就考者九族拘繫及所過歷長少婦女皆  
被桎梏應木屐之象也 靈帝建寧中京都長者皆以  
輦方笥為粧具下士盡然時有識者竊言輦方笥郡國  
獻篋也今珍用之此天下人皆當有罪獻於理官也到  
光和三年癸丑赦令詔書吏民依黨禁錮者赦除之有  
不見文他以類比疑者獻於是諸有黨郡皆獻廷尉人  
名悉入方笥中 靈帝好諸異服帷帳牀坐飲食歌舞  
空篋笛簫樂等京都貴戚皆競為之及獻帝建始中董

卓多擁邊兵填塞街衢虜掠宮掖發掘園陵 靈帝於  
宮中西園駕四白驢躬自操轡驅馳周旋以為大樂於  
是公卿貴戚轉相放效至乘輜輶以為騎從互相侵奪  
賈與馬齊案易曰時乘六龍以御天行天者莫若龍行  
地者莫如馬詩曰四牡騤騤載是常服檀車煌煌四牡  
彭彭夫驢乃服重致遠上下山谷野人之所用耳何有  
帝王君子而驂服之乎遲鈍之畜而今貴之天意若曰  
國且大亂賢愚倒植凡執政者皆如驢也其後董卓陵

虐王室多援邊人以克本朝殊方部落跨蹈中國 熹

平中省內冠狗帶綬以為笑樂有一狗突出走入司徒

府門或見之者莫不驚怪

棗山松書曰光和四年又於西園弄狗以配人也

京

房易傳曰君不正臣欲篡厥妖狗冠出後靈帝寵用羣

小又於西園賣官天戒若曰在位多非其人如狗而冠

也 靈帝數遊戲於西園中令後宮采女為客舍主人

身為商賈服行至舍采女下酒食因共飲食以為戲樂

此服妖也其後天下大亂

風俗通曰時京師賔婚嘉會皆作魁槿酒酣之後續以挽

歌魁擧喪家之樂挽歌執紼相偶和之者天戒若曰國  
家當急殄悴諸貴樂皆死亡也自靈帝崩後京師壞滅  
戶有兼屍蟲而相食  
魁擧挽歌斯之效也  
獻帝建安中男子之衣好為長

躬而下甚短女子好為長裙而上甚短時益州從事莫  
嗣以為服妖是陽無下而陰無上也天下未欲平也後  
還遂大亂

魏武帝以天下凶荒資財匱乏始擬古皮弁裁黹帛為  
白帟

苦洽反

以易舊服傳元曰白乃軍容非國容也干寶

以為縞素凶喪之象也名之為帟毀辱之言也蓋革代



之後刼殺之妖也

明帝日著繡帽披縹

反 敷 紹

紉半袖

常以見直臣楊阜諫曰此禮何法服邪帝默然蓋近服

妖也夫縹非禮之色褻

薛音

服尚不以紅紫況接臣下乎

人主親御非法之章所謂自作孽不可禳也帝既不享

永年身沒而祿去王室後嗣不終遂亡天下

景初元

年發銅鑄為巨人二號曰翁仲置之司馬門外按古長

人見為國亡長狄見臨洮為秦亡之禍始皇不悟反以

為嘉祥銅鑄人以象之魏法亡國之器而於義竟無取

焉蓋服妖也 尚書何晏好服婦人之服傳元曰此服妖也夫衣裳之制所以定上下殊内外也大雅云元衮赤舄鉤膺鏤錫歌其文也小雅云有嚴有翼共武之服詠其武也若内外不殊王制失叙服妖既作身隨之亡末嬉冠男子之冠桀亡天下何晏服婦人之服亦亡其家其咎均也

吳婦人修容者急束其髮而削

音靡

角過於耳蓋其俗自

操束太急而廉隅失中之謂也故吳之風俗相驅以急

言論彈射以刻薄相尚 孫休後衣服之制上長下短  
又積領五六而裳居一二千寶曰上饒奢下儉逼上有  
餘下不足之妖也至孫皓果奢暴恣情於上而百姓彫  
困於下卒以亡國

晉武帝泰始初衣服上儉下豐著衣者皆厭襖

一宵反此

君衰弱臣放縱下掩上之象也至元康末婦人出兩襠  
加乎交領之上此內出外也為車乘者苟貴輕細又數  
變易其形皆以白蔑為純蓋古喪車之遺象也夫乘者

君子之器蓋君子立心無恒事不崇實也干寶以為晉之禍徵也及惠帝踐阼權制在於寵臣下掩上之應也至永嘉末六宮才人流冗沒於劉石內出外之應也天下撓亂宰輔方伯多負其任又數改易不崇實之應也秦始之後中國相尚用交牀音牀音及為羌煮貊炙貴人富室必畜其器吉亨嘉會皆以為先 太康中

又以氈為紒

與帕同莫格反方言帕頭幪頭也南楚江淮之間曰帕頭自關以西秦晉之郊曰絡

頭字書帕頭中

者也幪且消反頭及絡帶袴口百姓相戲曰中國必為

北所破夫氍毹

此為反

產於北而天下以為紒頭帶身袴

口彼既三制之矣能無敗乎至元康中氐羌互反永嘉後劉石遂篡中都自後羣雄迭據華土是服妖之應也

初作履者婦人頭圓男子頭方圓者順之義所以別男女也至太康初婦人履乃頭方與男無別此賈后專妬之徵也 太康中天下為晉世寧之舞手接杯盤而

反覆之歌曰晉世寧舞杯盤識者曰夫樂生人心所以觀事也今按杯盤於手上而反覆之至危之事也杯盤

者酒食之器而名曰晉世寧言晉世之士苟偷於酒食之間而知不及遠晉世之寧猶杯盤之在手也 惠帝

元康中婦人之飾有五兵佩又以金銀瑇瑁之屬為斧鉞戈戟以當笄干寶以為男女之別國之大節故服物異等贅幣不同今婦人而以兵器為飾此婦人妖之甚者於是遂有賈后之事終亡天下是時婦人結髮者既成以繒急束其環名曰擷胡結反子紉始自中宮天下化之其後賈后廢害太子之應也 元康中天下始相倣

為烏杖以拄掖其後稍施其鐵

徒猥反

住則植之夫木東

方之行金之臣也杖者扶體之器烏其頭者尤使用也  
必旁拄掖者旁救之象也施其金住則植之言因為金  
能孤立也及懷愍之世王室多故而此中都喪敗元帝  
以藩臣樹德東方維持天下拄掖之應也至社稷無主  
海內歸之遂承天命建都江外獨立之應也 元康泰

安之間江淮之域有敗屨

音脚

自聚於道多者至四五十

量人或散投坑谷明日視之復如故或云見狸銜聚之

干寶以為夫屬者人之賤服處於勞辱黔庶之象也敗者疲敝之象道者四方往來所以交通王命也今敗屬聚於道者象黔庶罷病將相聚為亂以絕王命也泰安中癸丑午兵百姓怨叛江夏張昌倡亂荆楚從之如流於是兵革歲起服妖也 初魏造白帻橫縫其前以別後名之曰顏俗傳行之至永嘉之間稍去其縫名無顏帻而婦人束髮其緩彌甚紒之堅不能自立髮被於額目出而已無顏者愧之言也覆額者慙之貌也其緩彌



甚者言天下亡禮與義放縱情性及其終極至於大恥也永嘉之後二帝不反天下醜焉 孝懷帝永嘉中士

大夫競服生箋單衣識者指之曰此則古者總衰

音諸雀

侯所以服天子也今無故服之殆有應乎其後遂有劉氏之亂帝遇害焉 元帝大興中兵士以絳囊縛紒識

者曰紒者在首為乾君道也囊者坤臣道也今以朱囊縛紒臣道上侵君之象也於是王敦陵上焉舊為羽扇柄者刻木象其骨形列羽用十取全數也自中興初王

敦南征始改為長柄下出可捉而減其羽用八識者尤之曰夫羽扇翼之名也創為長柄者將執其柄以制羽翼也改十為八者將未備奪已備也此殆敦之擅權以制朝廷之柄又將以無德之材欲竊非據也是時為衣者又上短帶纔至於掖著帽者又以帶縛項下逼上上無地也為袴者直幅為口無殺下大之象尋而王敦謀逆再攻京師海西嗣位忘設豹尾天戒若曰夫豹尾儀服之主大人所以豹變也而海西豹變之日非所宜

忘而忘之非主社稷之人故忘其豹尾示不終也尋而

被廢焉 孝武太元中人不復著帟

七遙反

頭天戒若曰

頭者元首帟者助元首為儀飾者也今忽廢之若人君  
獨立無輔佐以至危亡也至安帝桓元乃篡位焉 舊

為履者齒皆達櫛

扶然反

上名曰露卯太元中忽不徹名

曰陰卯識者以為卯謀也必有陰謀之事至烈宗末驃  
騎參軍袁悅之始攬構內外隆安中遂謀詐相傾以致  
大亂 太元中公主婦女必緩鬢傾髻以為盛飾用髮

皮義反既多不可恒戴乃先於木及籠上裝之名曰假髻

或名假頭至於貧家不能自辦自號無頭就人借頭遂布天下亦服妖也無幾時孝武晏駕而天下騷動刑戮無數多喪其元至於大殮力驗反皆刻木及蠟或縛菰草為頭是假頭之應云

桓元篡立殿上施絳帳鏤黃金為顏四角金龍銜五

色羽葆音保流蘇羣下相謂曰顏類輜音而車尋而元敗

此服之妖也

晉末皆冠小而衣裳博大風流相放輿臺成俗識者曰  
上小而下大此禪代之象也尋而宋受終焉

齊武帝永明中百姓忽著破後帽始自建業流於四遠  
貴賤翕然服之此服妖也帽自蕭詵之家其流遂遠天  
意若曰武穆文昭皆當滅而詵亦誅死之效焉 又時

以燕支為朱衣朝士皆服之及明帝以宗子入纂此又  
奪朱之效也 時又多以生紗為帽半其裊而折之號  
曰倚勸先是人問語好云擾攘建武至是朝士勸進實

為怒遽倚勸擾攘之言驗 東昏時百姓皆著下屋白  
紗帽而反裙覆頂東昏曰裙應在下今更在上不祥命  
斷之於是百姓皆反裙向下此服妖也帽者首之所寄  
今而向下天意若曰元首方為猥賤乎東昏又令左右  
作逐鹿帽形甚窄狹後果有逐鹿之事東昏宮裏又作  
散叛髮反髻根向後百姓爭學之及東昏狂惑天下散  
叛矣東昏又與羣小別立帽騫其口而舒兩翅名曰鳳  
度三橋褰向後總而結之名曰反縛黃麗東昏與刀敕

之徒親自著之皆用金寶鑿以璧璫又作著調帽鏤以金玉間以孔翠此皆天意梁武帝舊宅在三橋而鳳度之名鳳翔之驗也黃麗者皇離為日而反縛之東昏戮死之應也調者梁武帝至都而風俗和調先是百姓及朝士皆以方帛填胸名曰假兩此又服妖假非正名也儲兩而假之明不得真也東昏誅其子廢為庶人假兩之意也

北齊婁后卧疾寢衣無故自舉俄而后崩 文宣帝末

年衣錦綺傳粉黛數為胡服微行市里粉黛者婦人之飾陽為陰事君變為臣之象也及帝崩太子嗣位被廢為濟南王又齊氏出自陰山胡服者將反初服也錦綵非帝王之法服微服者布衣之事齊亡之效也 後主好令宮人以白越布折額狀如髻幘又為白蓋此二者喪禍之服也後主果為周武帝所滅父子同時被害

武平時後主於苑內作貧兒村親衣縑縷之服而行乞其間以為笑樂多令人服烏衣以相執縛後主果為周



所敗被虜於長安而死妃后窮困至以賣燭為業又婦人皆剪剔以著假髻而危邪之狀如飛鳥至於南面則髻心正西始自宮內為之被於四遠天意若曰元首剪落危側當走西也又為刀子者刀皆狹細名曰盡勢遊童戲者好以兩手持繩拂地而却上跳且喝曰高末高末之言蓋高氏運祚之末也

後周靜帝大象元年服冕二十四旒車服旗鼓皆以二十四為節侍衛之官服五色雜以紅紫令天下車以大

木為輪不施輻朝士不得佩綬婦人墨粧黃眉又造下  
帳如送終之具令五皇后各居其一實宗廟祭器於前  
帝親讀版而祭之又將五輅載婦人身率左右步從又  
倒懸雞及碎瓦於車上觀其作聲以為笑樂皆服妖也  
帝尋暴崩而政由於隋周之法度皆悉改易

隋文帝開皇中房陵王勇之在東宮及宜陽公王世積  
家婦人所服領巾製同槩幡軍幟婦人為陰臣象也而  
服兵幟臣有兵禍之應矣勇竟廢而遇害世積坐伏誅

唐初宮人乘馬者依周舊儀著罽羅全身障蔽永徽後  
乃用帷帽施裙及頸頗為淺露至神龍末罽羅始絕皆  
婦人預事之象太尉長孫無忌以烏羊毛為渾脫氍帽  
人多效之謂之趙公渾脫近服妖也 高宗嘗內宴太  
平公主紫衫玉帶皂羅折上巾具紛礪七事歌舞於帝  
前帝與武后笑曰女子不可為武官何為此裝束近服  
妖也 武后時嬖臣張易之為母戚作七寶帳有魚龍  
鸞鳳之形仍為象牀犀簾 安樂公主使上方合百鳥

毛織二裙正視為一色傍視為一色日中為一色影中  
為一色而百鳥之狀皆見以其一獻韋后公主又以百  
獸毛為韉面韋后則集鳥毛為之皆具其鳥獸狀工費  
巨萬公主初出降益州獻單絲碧羅籠裙縷金為花鳥  
細如絲髮大如黍米眼鼻背甲皆備瞭視者方見之皆  
服妖也自作毛裙貴臣富家多效之江嶺奇禽異獸毛  
羽採之殆盡韋后妹嘗為豹頭枕以辟邪白澤枕以辟  
魘伏熊枕以宜男亦服妖也 中宗景龍二年十一月

郊祀韋后為亞獻以婦人為齋娘以祭祀之服執事近服妖也 中宗賜宰臣宗楚客等巾子樣其制高而踳即帝在藩邸時冠也故時人號英王踳踳顛仆也 元宗開元二十五年正月道士尹愔為諫議大夫衣道士服視事亦服妖也 天寶初貴族及士民好為胡服胡帽婦人則簪步搖釵衿袖窄小楊貴妃常以假鬢為首飾而好服黃裙近服妖也時人為之語曰義髻拋河裏黃裙逐水流 憲宗元和末婦人為圓鬟椎髻不設鬢

飾不施朱粉惟以烏膏注唇狀似悲啼者圓鬟者上不  
自樹也悲啼者憂恤象也 文宗時吳越間織高頭草  
履纖如綾縠前代所無履下物也織草為之又非正服  
而被以文飾蓋陰邪闖葦泰侈之象 僖宗乾符五年  
雒陽人為帽皆冠軍士所冠者又內臣有刻木象頭以  
裹幘頭百官效之工門如市度木斫之曰此斫尚書頭  
此斫將軍頭此斫軍容頭近服妖也 僖宗時內人束  
髮極急及在成都蜀婦人效之時謂為囚髻唐末京都

婦人梳髮以兩鬢抱面狀如椎髻時謂之拋家髻又世俗尚以琉璃為釵釧近服妖也拋家流離皆播遷之兆云 昭宗時十六宅諸王以華侈相尚巾幘各自為制度都人效之則曰為我作某王頭識者以為不祥

蜀王衍晚年俗競為小帽僅覆其頂俛首即墮謂之危腦帽衍以為不祥禁之而衍好戴大帽每微服出游民間以大帽識之因令國中皆戴大帽又好裹尖巾其狀如錐而後宮皆戴金蓮花冠衣道士服酒酣

免冠其髻髻然更施朱粉號醉粧國人皆效之

宋太祖建隆初時當蜀孟昶末年婦女競治髮為高髻號朝天髻未幾昶入朝京師江南李煜末年有衛士秦友登壽昌堂榻覆其鞵而坐訊之風狂不寤識者云鞵友履也其李氏將覆於此地而為秦所有乎履與李友與有同音趙與秦同祖又煜宮中盛雨水染淺碧為衣號天水碧未幾為王師所克士女至京師猶有服者天水國姓之望也太宗淳化三年京師里巷婦人



競剪黑光紙團鑿又裝鏤魚腮中骨號魚媚子以飾面  
或曰黑水行魚水族皆陰類也面為六陽之首陰侵於  
陽將有災明年京師秋冬積雨衢路水深數尺 真宗  
景德四年春京城小兒裂裳為小旗繫竿首相對揮颭  
兵鬪之象也是歲宜州卒陳進為亂出師討平之 高  
宗紹興二十一年行都豪貴競為小青蓋飾赤油火珠  
於蓋之尊出都門外傳呼於道國朝以火德興赤火祥  
也又珠者乘輿服御飾升龍用焉臣庶以加於小蓋近

服妖亦僭咎也 又都市為戲加篋巾披卧辣執籐鞭

羣吹鷓鴣笛撥葫蘆琴效北人為禮長跪獻酒時金患

僅定上念境土未復將請河南地命有司禁止之與漢

靈帝時旋舞唐天寶北妝同占皆服妖也 二十三年

士庶家競以胎鹿皮製婦人冠山民採捕胎鹿無遺

九月

庚子言者以暴殄傷仁  
遂申嚴景祐捕鹿之禁

紹興初去宣和未遠婦人服

飾尚集翠羽為之與唐志百鳥毛織裙同占二十七年

交趾貢翠羽數百上命焚之通衢

至是始立法亦禁之

光宗紹

熙元年里巷婦人初以琉璃釵為首飾唐志琉璃釵釧有流離之兆亦服妖也後連年有饑流之厄

### 射妖

周宣王殺杜伯而無辜後三年王會諸侯田於圃日中起於道左衣朱衣冠操朱弓矢射王中心折脊而崩

莊公十八年秋有蜮劉向以為蜮生南越越地多婦人男女同川淫女為主亂氣所生故聖人名之曰蜮蜮猶惑也在水旁能射人射人有處甚者至死

以氣射人也

南方

謂之短弧

即射工也亦呼水弩

近射妖死亡之象也時莊公將娶

齊之淫女故蜮生後女淫於二叔

叔牙慶父

兩子見弑夫人

亦誅劉歆以為蜮盛暑所生非自越來也京房易傳曰

忠臣進善君不試

試用也

厥妖國生蜮

哀公時有隼集

陳廷而死楛矢貫之

楛木名堪為箭筈

石砮

砮鏃也

長尺有咫陳

閔公使人問仲尼對曰隼之來也遠矣昔武王克商通

道百蠻使各以方物來貢肅慎貢楛矢

肅慎東北夷

石弩長

尺有咫先王分異姓以遠方職使母亡服

服事也

故分陳

以肅慎矢試求之故府果得之劉向以為隼近黑祥貪  
暴類也矢貫之近射妖也死於廷國亡表也象陳眊亂  
不服事周而行貪暴將致遠夷之禍為所滅也其後陳  
卒為楚所滅

後漢靈帝光和中雒陽男子夜龍以弓箭射北闕吏收  
考問辭居貧負責無所聊生因買弓箭以射近射妖也

風俗通曰龍從兄陽求臘錢龍假取繁數頗厭患之陽  
與錢千龍意不滿欲破陽家因持弓矢射元武門東闕  
吏士呼問首服詔龍其後車騎將軍何苗與兄大將軍  
以重論陽不連坐

進部兵還相猜疑對相攻擊戰於闕下苗死兵敗殺數千人雒陽宮室內人燒盡

蜀車騎將軍鄧芝征涪陵見元猿緣山手射中之猿拔其箭卷木葉塞其瘡芝曰嘻吾違物之性其將死矣俄而卒此射妖也一曰猿母抱子芝射中之子為拔箭取木葉塞創芝歎息投弩自知當死

晉恭帝為瑯琊王好奇戲嘗閉一馬於門內令人射之欲觀幾箭死左右有諫者曰馬國性也今射之不祥於

是乃止而馬已被十許箭矣此蓋射妖也俄而禪位云  
東魏孝靜武定四年後齊神武作宰親率諸軍攻西魏  
於玉壁其年十一月帝不豫班師將士震懼皆曰韋孝  
寬以定功弩射殺丞相西魏下令國中曰勁弩一發凶  
身自殞神武聞而惡之其疾暴增近射妖也洪範五行  
傳曰射者兵戎禍亂之象氣逆天則禍亂將起神武行  
殿中將軍曹魏諫曰王以死氣逆生氣為客不利主人  
則可帝不從頓軍五旬頻戰沮衄又聽孤虛之言於城

北斷汾水起土山其處天險千餘尺功竟不就死者七萬氣逆天之咎也其年帝崩明年王思政擾河南

北齊武平後主自并州還鄴至八公嶺夜與左右歌而行有一人忽發狂意後主以為狐媚伏草中彎弓而射之傷數人幾中後主後主執而斬之其人不自覺也狐而能媚獸之妖妄也帝時不恤國政專與內人閹豎酣歌為樂或衣縵縷衣行乞為娛此妖妄之象人又射之兵戎禍亂之應也未幾而國滅



宋理宗淳熙十四年正月闋宦競以小弓矢射於殿廡  
為戲弓長尺餘箭繞數寸近射妖也 寧宗慶元五年  
諸軍器械所造筒子弩柳木牌以為戲木弩加以竹筩  
蔽以方布剔以角篋時朝廷遣使閱習器械射妖之戒  
若曰除戎器皆兒戲也後開禧卒有兵弗戢之禍



文獻通考卷三百十